

Basef Amama Bu'wami Mak Nanda'ami Basef bandami Mak nanda'ami

1:1-13 God nasapa' Jon napisi'as embeli nafi'i
 1:14-13:37 God nasapa' Jisas nafi'i nawalipasa
 basef Ananimi
 14:1-15:47 Jisas name' ekep pahana ma saun-
 dana sahana lawag usi'inai tu'wanainai
 16:1-20 Jisas nohafel wapoti' nase'asa maol
 alupisi ananisi

*Jon napisi'as embel nawalipasa basef Godi
 (Mt 3:1-12; Lu 3:1-9,15-17; Jo 1:19-28)*

¹⁻² Basef amama bu'wamima Jisas Kraisi, Anan nogalomana Godi. Basef amama mohafel mataga si'i anona profet fowa'inai Aisaia nanda'am mape buk.

Aisaia na'i basef amama na'i,
 “God na'ipa Jisas na'i, ‘Ine' neme'. Anona nemaf
 ae' esapa' anona aman nofa' basef Ae'ami
 nili' nefe' nendondombamena eaf ine'inai.

³ Anona etap wafiguma fatauguma malogel anona amani anona nemaf ni'i basef na'ama ni'i,
 “Ipe' pendondomba eafa Dembinai.” ’ ’ ”

⁴ Ea' Jon napisi'as embel nafe' anagon wafiguma fatauguma nawalipasa basef amam nematawa hiesi na'ipas na'i, “Ipa pewa' alafugaha waf aonai pemboma opalef ma God pefa' baptaisa God nekwahomepa waf

aonai panda'anai.” ⁵ Ea' esis hiesi sape etap hiagoma Judia saloma amam nematawa hiesi sape Jerusalemi hi'alas safi'mai Jon sa'i some' basef ananimi. Esis sawalapa waf aonai esis sanda'anai, ea' Jon napisi'as walemb Jordan. ⁶ Jon nala anom klos sanda' auf anom mafis lu'wami kamelim sanda'am, ea' nowaho'am let sanda' agwahup mafisina sanda'anai, nagundisana. Gwa'aimi na' gwamu'wis maloma aupimbel aolupumi. ⁷ Ea' nawalapa basef na'i, “Anona aman nambimb nigima ae' niefi'i, anan la'ifinai nikila' ae'. Ae' ina aman bu'uwei ma eatagaha mandelefa su ananimi, owa'. Nambimb Anan nese'epa Ambal Bu'unai Godi nope opalef ipe'imi nomon. ⁸ Ae' apisi'ipa embel atom wafimi ea' Anan owa'. Nambimb Anan nupisi'ipa Ambal Bu'unai Godi nuwisipa nope nolomepa.”

Jon napisi'a Jisas walemb Jordan
(Mt 3:13-17; Lu 3:21-22)

⁹ Nogota anama Jisas nakwaha Nasaret etap hiagoma Galili nafi'i. Ea' Jon napisi'ana embel walemb Jordan. ¹⁰ Jisas nakwaha embel walemb nandegiai, nati heven uta nandausi' alihina ma Anan, nati Ambal Bu'unai Godi nafi'mai anan si'i amil mai'una nufia' nisila'manai. ¹¹ Ea' anona maf na'i natagai heven na'i anom basef na'i, “Ine' nogalome. Ae' okom nainailina endilisi. Okom ae'anai bo'ona endilisi ma ine'.”

Satan nagwamba Jisasa nonda' waf aonai
(Mt 4:1-11; Lu 4:1-13)

¹²⁻¹³ Ea' Ambal Bu'unai Godi nofa' Jisas nafe' anona etap fatauguma wafiguma mafis atom

aolupumi maituma nape nimeguf 40-peleim, aon si'inai tu'waninai. Ea' Satan nafi'i nagwambana na'i Jisas nonda' waf aonai. Nagwambana ma ea', amam ensel mafi'i mumafi Jisas magiambamana.

Jisas nafela maol nanda'ana gani etap hiagoma Galili

(Mt 4:12-17; Lu 4:14-15)

¹⁴ Nemaf anama amam manda' Jon nanda' kalabus, Jisas nafe' etap hiagoma Galili nanda' maol nawalapa basef bu'wami Godi na'ipasam ¹⁵ na'i, “Nemaf anama felefele' netaga ma epes hiesi siowis wambota Godi numafias. Na'ama dei' ipe' pemboma opalef pefe'ma God pewa' alafugaha waf aonai.”

Jisas nofala amam biami biam ma milana mefe'
(Mt 4:18-22)

¹⁶ Jisas naila akata nafe' etin walemb batupa'manai lu'unai Galili, nati amam biam Saimon naloma owalomana Andru. Amam mala anemb magi agof manda' bisnis. ¹⁷ Ea' Jisas natolom na'ipam na'i, “Ipe' pifi'i pembalo'a basef ae'ami pila Ae'. Fowa' ipe' pagi agof, ea' dei' ihi'ambepa pefe' pi'ipa enis epes sila ae'.”

¹⁸ Ea' mame'ana makwaha anemb ma'oh, mailana mafe'. ¹⁹ Ea' nindiki'ah nafo'o felefele' ma akata nati Jems naloma owalomana Jon, Sebedi batausana. Amam matoma bot mape magundisa anemb amamumi. ²⁰ Ea' Jisas natolom nofalam mehipe mame'ana. Ea' mohafel mehipe makwaha amamaga amamumi hi'alam ma'oh, ea' mailana mafe.

*Jisas natofa ambal aonai nape anona amani
(Lu 4:31-37)*

²¹ Jisas naloma alupumi ananimi Jems naloma Jon, Saimon naloma Andru mafe' Kaperneam mape. Nemaŋ anama esis Juda sapoma noma'wanai, Jisas nao'wam mafe' mawis ipat esis Juda sa'i baseŋ sapeinai ea' na'ipasa baseŋ amam nematawa. ²² Esis same' baseŋ ananimi ea' gegelalasis kwapete'as endilisi. Anan ina nawalipas si'i amam falafumi ma'ipas, owa'. Anan na'ipasa baseŋ la'ifimi si'i amam agufumi ma'ipas. Amam mawalipasa mi'uli Godi ina mawalipas na'ama si'i anan, owa'.

²³ Nemaŋ anama anona aman nape nalomas ipat anama, ambal aonai napeinai ea' mehipeŋ etin ambal anama noga na'i mehipeŋ na'i, ²⁴ “Jisas ine' Nasaretinai, ine' nafi'li na'i nenda' maina afa'? Nafi'li ma nehambombagafa? Ae' egawena ine' aman bu'winai Godi.”

²⁵ Ea' Jisas ninifalom na'i, “Ine' ambalipeŋ aonai, feso'mena kwaha aman anama fo'o.”

²⁶ Ea' ambal anama aonai nakoto'ana kwapete'ana nanda'am ge'ala mehipeŋ nakwahona nawisi nafe'. ²⁷ Ea' amam nematawa hiesi gegelalasis sandakoto'ma ea' sanda'ipama sa'i, “Amama main de'im? Amama anom baseŋ dambaimi. Anan natofa ambagof awami na'ipam si'i anona aman la'ifinai. Amamaga hiami mame' baseŋ Ananimi. Ambagof awami wapoti' mame' basefana makwaha epes mafa' mafe'.”

²⁸ Ea' baseŋ amama ma maol Jisas nanda'ana mafe'agon hi'alagon wambel hiagoma nape nomona etap hiagoma Galili.

*Pita nandagi'mokwi awasi'w alop nifina ea'
Jisas nanda'akw ambo'okw*

(Mt 8:14-15; Lu 4:38-39)

²⁹ Jisas naloma alupumi biamibiam ananimiti mohafel makwaha ipat anama ea' mafe' wambel Saimoni Endrui ea' mawis ipat amamunai. Jems naloma Jon wapoti' mafe' malomam. ³⁰ Ea' esis sa'ipa Jisasa Saimon nandagi'mokwi awasi'w kwa'oh, alop akwa'unai nifina. ³¹ Ea' Jisas nafe'ma akwa'w nahapila lagel akwa'unai nafela'w kwataga bo'okw, kwanda'masa gwa'aimi esis.

*Jisas nanda' amam nematawa awes nanda'asi
sataga bo'wes*

(Mt 8:16-17; Lu 4:40-41)

³² Ea' aon nowala naso', esis sofa'ai epes awes naninani nanda'asi saloma enis ambagof awami mapeisi safi'mai Jisas. ³³ Ea' esis hiesi sape wambel lu'unai safi'i saitu felefele'ma uta ipat si'ina. ³⁴ Ea' Jisas nanda' amam namatawa hiesi awes nanda'asi bo'wes, natofamasa anom ambagof awami mapeisi ea' sataga bo'wes. Ambagof awami mogawa Jisas anan nogalomana Godi. Na'ama nasopama malogof ambagof amama awami faso'mam tol mape.

*Jisas nase'asa basef nafe' etap hiagoma Galili
(Lu 4:42-44)*

³⁵ Wafilu kuhimbita atona owamb ata' nail, Jisas nohafel nakwaha ipat anama napoma. Anan atona nohafel nafe' anama wafiguma ea' nape nanda' betena God. ³⁶ Saimon naloma anom alupumi ananimiti mohafel matimana owa', ea'

magolopana magi'mana mafe'. ³⁷ Magolopana mafe'ma matolona ma'ipana ma'i, "Epes hiesi sagolopena."

³⁸ Ea' Jisas nagwamama basef na'ipam na'i, "Dei' ata' ali'aso, afa' ofe' wambel hianai nape felefele'i. Ae' ata' i'ipasa basef bu'wami esis. Maol anama atona Ae' afi'manai anama."

³⁹ Na'ama nase'asa basef nafe'agon hi'alagon wambel hiagoma etap hiagoma Galili, nase'asa basef bu'wami nomon ifagw esis Juda sa'i basef sapaimi natofamasa ambagof awami mape enis epesi mandahi' mawisi mafe'.

*Aman awasinai alop ananinai nambu'wanai,
Jisas nanda'ana bo'ona*

(Mt 8:1-4; Lu 5:12-16)

⁴⁰ Ea' anona aman awesinai alop nambo'anai nafi'i felefele'ma Jisas nindiwa nembawa notawa na'ipana mehipe na'i, "I'i ine' ni'i a'e, nenda' ae' etaga bo'awe."

⁴¹ Ea' Jisas nati anan uwahipina nawomana lagela anan na'i, "Ae' a'i a'e ma ine' netaga bo'wena."

⁴² Ea' dei' atef aman anama alop nambu'wi nataga bo'ona.

⁴³ Ea' Jisas dei' etef nasapa'ana na'ipana mehipe
⁴⁴ na'i, "Ina nefe' ni'ipa enin epen ni'i ae' anda'ena bo'wena, owa'. Ine' fo'o nihi'ambana alop ine'inai ma aman anama pris. Ea' nese'ana amama anan nondolalima God ea' ine' ninifelana ma nataga bo'wena si'i mi'uli Ananinai fowa' Moses na'ipasanai na'i. Ama amam nematawa hiesi sotolona sogawa ine' ambo'wena."

45 Owa'etin. Aman anama na'ipasam mafe'agon hi'alagon amam nematawa hiesi sogawa anan nataga bo'ona. Ea' Jisas ina nafe' nawis anona wambel ma naep hiesi, owa'. Na'ama hiesi sifi'i sili'akwana. Ea' ina nawis anona wambel lu'unai, owa'. La'ela'ef nape anama wafiguma atogon. Ea' nambimb esis amam nematawa sape ganigani safi'mai anan.

2

*Jisas nagiangama anona aman lagufi bo'wagah maga'anai ambo'ona
(Mt 9:1-8; Lu 5:17-26)*

¹ Anom nimeguf mafe'ma ea', Jisas notanima nafe' Kaperneam. Ea' esis same' basefa Anan nafi'i nape ipat. ² Ea' amam nematawa hiesi sandakolas ipat anama napeinai asi'ina ea'. Na'ama uta owa' anagon nogal nopoma sefe' siowisi. Ea' na'ipasa basef bu'wami Godi ma esis. ³ Ea' anom amam biamibiam manda' balata malai anona aman lagof bo'wagah maga' mefa'ana ma'i mefe'ma Jisas. ⁴ Ipat asi'inama amam nematawa hiesi saitu sili'akw, ea' ina anagona mofa'ana muwis mofe' felefele'ma Jisas, owa'. Ea' malata ipat ilif ande'ana mapisila bogwan ilif mala aman anama awes nanda'anai naloma lahis nowala nomon Jisas naituma.

⁵ Nogota anama Jisas nati biamibiam nagawa amam mombale'efana ma'i anan la'ifinai ma nigiangama aman anama notaga bo'ona. Ea' na'ipa aman anama na'i, "Ine' epen ae'inai. Waf aonai ine' nanda'anai Ae' akwahomenana ea'."

⁶ Ea' anom dambami mawalipasa mi'uli Godi mape mame'ana. Opalef amamumi aoma basef ananiami. Na'ama amam nomonas matamea ma'i, ⁷ “Dei' maina Jisas na'iam na'ama? Anan nanda' God findiwana. Owa' etina anona aman la'ifinai ma neakwaha waf aonai epes sanda'anai. God atona nakwa waf aonai.”

⁸ Dei' atef Jisas nogawa nomonas amamumi negawam okom ananinai, ea' na'ipam na'i, “Dei' maina ukup ipe'imi mape na'ama? ⁹ Dei' amamaga maim ipe' pa'i ahifima Ae'? Ae' la'ifiwei ma i'ipa aman anama awesinai, i'i 'Ae' ekwahomena waf aonai ine' nanda'anai', o i'ipana, i'i, 'fela lahis ine'imi nehafel nefe'.' Ipe' pa'i maim ahifima ae'? ¹⁰ Ae' a'i ipe' pegawa ae' ataga epen endelisiwei, la'ifiwei ma ekwahomasa waf aonai hianai amam nematawa sape etap anae' sanda'anai. Ae' a'i ihi'ambepa ae' la'ifiwei ma enda' amamaga amama.” Ea' na'ipana na'i,

¹¹ “Ae' a'ipina, ine' hafel fela lahis ine'imi fo'o ipat ine'inai.”

¹² Ea' esis saitu satolona sati anan nohafel mehip nafela lahis ananiami nefa'am nafe'. Ea' amam nematawa hiesi gegelalasis kwapete'as, safela agel Godi lu'una sa'i, “Fowa' ape' ina mati anom amamaga si'i na'ama, owa'etin.”

Jisas nofala Livai

(Mt 9:9-13; Lu 5:27-32)

¹³ Ea' Jisas notanima naila akata nafe' walemb batupa'manai lu'unai Galili. Amam nematawa hiesi safi'mai anan na'ipasa basef bu'wami God.

¹⁴ Jisas nohafel nafe' ea', nati anona aman Livai,

Alfius nogalomana nape ipat sanda' takisa. Aman anama nofa'asa otamba amam nematawa hiesi.

Ea' Jisas nofalana na'i, "Ine' fi'i nila ae'."

Ea' nohafel nailana nafe'. ¹⁵ Ea' Jisas naloma alupumi ananiami ma' gwa'aimi ipat Livai maloma amam hiami manda' waf aonai. Anom mofa' takisi, anom manda' waf aonai amam maloma Jisas ma' gwa'aimi. Amam amama mailana etin. ¹⁶ Ea' amam dambami mawalipasa mi'uli Godi amam Farisi mati Jisas na' gwa'aimi naloma amam manda' waf aonai maloma amam amama mofa' takisi. Ea' mahali' alupumi ananiami ma'i, "Dei' maina anan nape naloma amam mofa' takisi maloma amam amama manda' waf aonai ma' gwa'aimi etifigin?"

¹⁷ Ea' Jisas name'am na'ama na'ipam na'i, "Epes bu'wasi ina safe'ma dokta, owa'. Isima awes nanda'asi etis safe'ma dokta. Ae' ina afi'i ma efala epes isima bu'wasi, owa'. Ae' afi'i ma efala isima sanda' waf aonai."

Waf anama amam Farisi maloma alupumi Joni makwaha gwa'aimi ma monda' beten

(Mt 9:14-17; Lu 5:33-39)

¹⁸ Anona nemaf amam amama alupumi Joni maloma anom alupumi Farisi makwaha gwa'aimi ma monda' beten andeande'. Ea' enis epes safi'i sa'ipa Jisas sa'i, "Dei' maina amam alupumi Joni maloma alupumi amam Farisi makwaha gwa'aimi ma manda' beten, ea' alupumi ine'imi owa' mokwaha gwa'aimi?"

¹⁹ Ea' Jisas nagwamama basef na'i, "I'i enis sonda' anom gwa'aimi lu'wami ma enis aman nemata'w bias sendase'ama, ipe' pa'i

esis alupisi atuwasi sondaiwa'ma gwa'aimi amama? Owa'etin. Nema'f anama esis bias sondase'ama, alupisi asasisi sandanifela sea' gwa'aimi solomas. ²⁰ Ea' anona nema'f enis epes sofa' aman anama naso' nemata'wi nefe' laoguma, wila esis sokwaha gwa'aimi, ea' dei' ata' owa'."

²¹ Ea' Jisas nanda' anom base'f wamun etina luwaguf na'i, "Ina andeande'ma peatopa' lowaf namunai pigundisana neloma anona lowaf apinai, owa'. I'i penda'am na'ama, nambimb lowaf anama namunai pele'etana nehape' apinai nogal notaga lu'una."

²² Ea' na'i anom base'f wapoti' na'i, "Ina enin epen nakolo'wa embel wain dambainai agwahup mafinina mowala agwahup apinai si'i botowagof, owa'etin. I'i enin nenda'am na'ama, embel wain motef hiami, mohape' agwahup anama pele'etana ea' wain kolo'olam hi'ilam. Na'ama owa'. Enin nakolo'am agwahup dambainai atona."

*Nema'f Sabat esis Juda sapoma noma'wanai
(Mt 12:1-8; Lu 6:1-5)*

²³ Anona nema'f esis Juda sapoma noma'wanai Sabat, Jisas nafe' nawis anona aof sawa witanai ea' nawis. Ea' alupumi ananiami mafe' malomana magi anom wit maufi magwa'am.

²⁴ Ea' anom dambami Farisi ma'ipa Jisas ma'i, "Neme'. Alupumi ine'imi manda'am na'ama ma main? Amam mosambala mi'uli ma nema'f anama mapoma noma'wanai, Sabat."

²⁵ Ea' Jisas na'ipa amam Farisi na'i, "Ipe' owa' pegawa base'f mape Baibeli ma waf fowa' gani

king Devit nanda'anai. Nemaſ anama Devit naloma alupumi ananiami gwa'aيمي a'am nolomaham. Ipe' pegawa baseſ amama ea'. ²⁶ Nemaſ anama Abiata nape dembinai pris nali'ma amam prisi, Devit nolomahana nawis ipat Godi na' bret anama mondolalima Godanai. Mi'uli ape'inai lu'unai na'i amam pris atom mea'ana. Enis epes owa'. Ea' Devit na'ana nagwa'ana nasol alupumi ananiami magwa'ana etin.”

²⁷ Ea' Jisas na'ipa amam Farisi wapoti' na'i, “God nali' nanda' epes ea' nagi' na'ipasa nemaſ sapoma noma'wanai Sabat ama nigiambas. Ina nanda' epesa sagi'ma basefa Sabat, owa'. ²⁸ Ae' atowe ataga epen endilisiwei ape Dembiwei ma amamaga hiami. Ea' ape Dembiwei ma nemaſ anama Sabata i'ipipa maina maol ande-ande'ma pila baseſ penda'ana nemaſ anama.”

3

*Jisas nanda' aman lagel nendela'anai bo'ona
nemaſ anama sapoma noma'wanai Sabat
(Mt 12:9-14; Lu 6:6-11)*

¹ Anona nemaſ Jisas nafe' nawis ipat esis Juda sa'i baseſ sapeinai, nati anona aman lagel ananinai naga' nail nape. ² Ea' enis safe' sagolopa baseſ kwamaimi ma senda'mana baseſ. Ea' satolona naep maimailana ma siti nonda' aman anama bo'ona nemaſ anama Sabat?

³ Ea' Jisas na'ipa aman anama lagel ananinai naga' nailanai na'i, “Ine' hafel nitu naep epes hiesi la'afena sitilina.” ⁴ Ea' Jisas nahali'as na'i “Mi'uli lu'unai ape'inai na'iam na'imama? Ape' monda' waf bu'unai nemaſ anama sapoma

noma'wanai o monda' waf aonai? Ape' mi-giambama esis sope ambal namunai napeis mo-has soga'?"

Ea' esis ina sa'i anom basef, owa'. ⁵ Ea' Jisas nafela naep natilis tulif ea', nogawa esis opalef mase' sandaiwa'ma seme' basef. Na'ama okom ananinai wandafuna ma esis. Ea' nati esis uwahipis na'ipa aman anama lagel ananinai naga' nailanai na'i, "Dowa lagel ine'inai usi'ina."

Ea' nandowanai nataga bo'ona wapoti'. ⁶ Ea' amam dambami Farisi mohafel mafe' maloma anom amam epes hiami Heroti, ma'i basef mandame'mama moha Jisas noga'.

Amam nematawa hiesi sunduwa'anima sape felefele'ama walemb batupa'manai lu'unai Galili

⁷ Ea' Jisas naloma alupumi ananiami makawaha wambel anama mafe' walemb batupa'manai lu'unai Galili. Ea' amam nematawa hiesi safi'i etap hiagoma Galili sailana safe'. ⁸ Esis safi'i hiagoma. Enis safi'i wambel hiagoma Judia, enis safi'i Jerusalem, enis safi'i etap hiagoma Idumea, ea' enis sape walemb Jordan gani wa'ol saloma enis safi'i wambel biefina Tair naloma Saidon, esis hiesi safi'mai anan. Same' basefa amamaga Jisas nanda'ami, na'ama safi'mai Anan. ⁹ Ea' Jisas nati amam nematawa hiesi endilisi sape. Ea' na'ipa alupumi ananiami na'i, "Na'ama esis safafa'asowe. Anona bot nola ma ae' ma elata etoma i'ipasa basef." ¹⁰ Anan fowa' nanda' hiesi isima awes nanda'asi sataga bo'wes. Ea' dei' awes nanda'asi sanda' gwagwasi'ma etin safe'ma anan sehapilana ma seataga bo'wes. ¹¹ Maina nemaf ambagof awami mape epesi mati Anan

mogawana, ea' mowa ma'oh etap felefele'ma anan opafunama, ea' mofalana mehipe ma'i, "Ine' nogalomana Godi." ¹² Ea' na'ipa ambagof awami mehipe amam ina mowalapa Anan mi'ipasana mi'i anan nogalomana Godi, owa'.

*Jisas nandandepa alupumi ananiami 12-peleim
(Mt 10:1-4; Lu 6:12-16)*

¹³ Jisas nafe' nondowasa' halaf, ea' nofala amam amama Anan okom na'iami mafi'mai Anan. ¹⁴ Ea' nandandepa amam 12-peleima la'ela'ef mope molomana, ama nambimb nos-apa'am mefe' mi'ipasa basef. Amam 12-peleim nandandepam Aposel. ¹⁵ Na'ipam nase'ama pepel ma meatofa ambagof awami mape epesi. ¹⁶ Amam 12-peleim nandandepami, agof amamumi amama. Saimon agel wa'ana Pita, ¹⁷ ea' Jems Sebedi nogalomana, naloma owalomana Jon, nase'ama agof wa'am Boanerges. Agel anama ofagema na'ama, nogamana otaga dililu bugalagw. ¹⁸ Ea' Andru, Filip naloma Bartolomyu, Matyu, Tomas, naloma Jems nogalomana Alfiusi, naloma Tadius naloma Saimon. Aman anama Saimon anan epes hiesi Seloti.* ¹⁹ Ea' Judas Kariotinai, aman anama nafe' nawalapa Jisasa naumbih.

*Anom ma'i Jisas nanda' maol naloma Belsebul
(Mt 12:24-32; Lu 11:14-23; 12:10)*

²⁰ Jisas nafe' anona ipat, ea' esis hiesi safi'i wapoti'. Ea' naloma alupumi ananiami ina ata' ma' gwa'aimi, owa'. ²¹ *Esis wambota Jisasi

* **3:18:** Niti futnot Matyu 10:4. * **3:21:** Jo 10:20

same' basef amama ma Anan naloma alupumi ina ma' gwa'aimi, ea' safi'i sa'i so'wana. Ea' sa'i, “Anan ambagof awami manda'ana dei' nahaga nagaol.”

22 *Anom mawalipasa mi'uli Godi mapani Jerusalem makini'i mambaso'am ma'i, “Ambal aonai Belsebul nape Jisas. Ea' Anan natofa ambagof awami ma pepel Belsebuli.”†

23 Ea' Jisas nofalai esis safi'i saitu felefele'ma anan na'ipasa anom basef womun etina esis na'i, “Satan ina natofa anan atona, owa'. 24 I'i enis anona wambel hiagoma esis etis sondawaloga biefisa sopa', ina nambimb la'ifis, owa'. Esis sandawaloga biefis ea' ina la'ifis. 25 I'i enis epes hiesi anona wambota sape ipat atotona sondawaloga epes biefis sopa', esis sandawaloga biefis, ina nambimb sope la'ifis, owa'. Sandawaloga biefis ea'. 26 I'i wambota Satani sondawaloga biefis sopa', ina la'ifis, owa'.”

27 “Enin epen ina la'ifina nefe' nuwis ipat anona aman la'ifinai napeinai nokowalefa nefa' amamaga ananimi, owa'. Enin ata' nili' nom-balo'ana ma nowa'ana tatala'ina, anan la'ifina ma niowis nokowalefa nefa' amamaga ma'oh ipat aman anama.”

28-30 Amam mawalipasa mi'uli Godi mambaso'am manda' findiwana ma'i, “Anona ambal aonai nagiambama Jisas nanda' maol ananinai.”

Ea' Jisas na'ipam na'i, “Endilisi etis ae' a'ipipa, anona nemaf God nokwaha waf aonai naninani

* 3:22: Mt 9:34; 10:25 † 3:22: Belsebul agel wa'ana Satan.

hianai noloma basef findiwaimi hiami amam nematawa sanda'ami hi'ilam. Ea' emi epen nenda' basef findiwama Ambal Bu'unai Godi, God anona nemaf owa'etin endilisi ma nokwaha findiwa anama aonai ma epen inima nanda'anai, owa'. Findiwa aonai la'ela'ef nopein dei' nefe' anona nemaf wapoti' la'ela'ef nope.”

*Mama'wana Jisasi kwaloma owapana ananimi
(Mt 12:46-50; Lu 8:19-21)*

³¹ Nemaſ anama Jisas naloma epeſ hieſi ſape ſalomana ipat nomon. Ea' mama'wana kwaloma owapana ananimi ſafi'i ſataga ſaitu ande'. Ea' ſa'ipa eniſ ſawiſ ſa'ipana ſa'i Jisasi nuwiſi ande' nefe'ma eſiſ. ³² Ea' iſima hieſi ſape ſalomanai ſa'ipana ſa'i, “Ine' neme', mama'wena ine'ikwi kwaloma owapena ine'imi ſafi'i ſaitu ande' ſa'i ſolomena ſi'i.”

³³ Ea' Jisasi nagwamaſa basef na'ipas na'ama na'i, “Mama'we owape ae'asi emi egafiſ?”

³⁴ Ea' Anan nati eſiſ amam nematawa ſape ſalipana na'ipas na'i, “Piti mama'we kwaloma owape ae'asi iſima. ³⁵ Emi egafiſ ſaila okom Godi ma ſila waf Ananinai, iſima mamase owape henitiame ae'asi.”

4

*Basef womun etina anona aman nowaha
olelemb ſi'i raiſ anona aof
(Mt 13:1-9; Lu 8:4-8)*

¹⁻³ Anona nemaf Jisasi naſefela opeh wapoti' nanda'am nawalipa amam nematawa hieſi fele-fele'ma walemb batupa'manai lu'unai Galili. Ea' eſiſ hieſi ſafi'i ſalipana ſape. Ea' nalata natoma

anona bot nala embel walemb batupa'manai anama, ea' esis saitu akata felefele'ma walemb anama. Ea' nase'asa basef hiami womun etin na'ama na'i, "Ipe' peme"! Anona aman nafe' nowaha oleleb witim si'i rais anona aof. ⁴Anan nowahom nafe', anom mowa eaf safe'ma ea' amiguf mufia' mafi'i ma'am. ⁵⁻⁶ Ea' anom mowa etap otambaiguma, etap ina lu'una, owa'. Kwaie'una. Natoma ilif atogon ina nowala owin, owa'. Ea' oleleb witim mataga mehip ea' masilimb ina mowala etap, owa'. Ea' owaf naluwi naham, otamba maofam alim. ⁷ Anom mowala la'afena mandelef wandafumi mataga malomam maofenia wit, ea' ina malo andeande' mail mola gwa'aimi, owa'. ⁸ Ea' anom mowa mafe' etap bu'unai, ea' mataga malo mail mola gwa'aimi. Anom mola 30-peleim, anom 60-peleim ea' anom mola 100-peleim."

⁹ Ea' Jisas na'ipas na'i, "Ipe' aligah magalipei peme' basef amama andeande' ukup mopomam."

*Jisas na'i basef womun etin
(Mt 13:10-17; Lu 8:9-10)*

¹⁰ Jisas atona nape, alupumi 12-peleim ananiami maloma enis sape salomanai safi'i sahali'ana ma basef amama womun etin. ¹¹ Ea' nagwamama basef na'i, "God nihi'ambepa basef ofagema mape mandambahi'i ma epes siowis wambota Ananinai numafias. Dei' God nihi'ambepa basef amama ofagema alihim. Ipe' pame'am pegawam ea'. Esis isima sololama Godi owa'. Esis same' basef womun etin. ¹² Ama anom basef mape Baibeli mandawalap ma'iam ma'i,

'Esis nimeguf hiami sotologon, ea' ina sati anom amamaga, owa'. Ea' esis some' basef ali-gah اساسمي, ea' ina sogawa ofagema, owa'. I'i sogawam ofagema, esis somboma opalef ma ae' ekwaha waf aonai esis sanda'anai. Owa'etin.' ”

Jisas nawalapa basef ofagema ma aman nowaha olelemb

(Mt 13:18-23; Lu 8:11-15)

¹³ Ea' Jisas nahali' esis na'i, “Ipe' owa' pegawa basef amama womun etin dei' apipami? Ea' nambimb ipe' pegawa basef womun etin hi'ilam pi'imama? Owa'etin. ¹⁴ Dei' aman anama nowaha olelemb, anan si'i anona na'ipasa basef Godi. ¹⁵ Olelemb mowa eafi amama si'i epes same' basef amama, ea' Satan nagi basef amama God nase'asam mape opalef اساسمي nakwahom nafe'. ¹⁶ Ea' anom mowa mafe' anagon otambaiguma, amama si'i enis epes same' basef Godi sofa'am mehip sandanifelamam. ¹⁷ Epes isima si'i masilimb ina malo mowala etap owin. Esis sembale'ef nogota bandana etin ea', nambimb nimanimi matagamas enis amam nematawa sandaiwa'ma sembale'am basef Godi sanda'as findiwas sahas, sanda'masa waf aonai ea' satanima safe'. ¹⁸ Ea' anom mowala mandelef wandafumi la'afen, amama si'i enis epes same' basef Godi sailam safe', ¹⁹ ea' amamaga hiami nimanimi maloma amamaga hiami esis satolom kowalasami baso'maimi maloma moni wiga maima esis sa'i sofa'ami hiami mape etapi, amama mataga maofenia basef Godi. Ea' ina sembale'ef sanda' waf bu'unai la'ifis, owa'. Sowa si'i gwa'aimi owa' molo andeande'. ²⁰ Ea'

anom mowa etap bu'unai si'i epes isima same' basef bu'wami sembale'am sanda' waf bu'unai. Enis si'i mola gwa'aimi 30-peleim, enis si'i mola 60-peleim, ea' enis si'i mola 100-peleim.”

*Enis sambaho' lamifah ma'oh owina baket
(Lu 8:16-18)*

²¹ Ea' Jisas na'ipas basef womun etin na'i, “A'i epes sakata lamifah sopalo'am ma'oh owina balatagw o sopalo'am mandambaho' ma'oh baket? Owa'. Esis sawamonam balatagw ilif. ²² Amamaga hiami mandambahi'i, anona nemaf motaga alihim epes hiesi sotolom sogawam. Ea' amamaga hiami ata' sambaho'am mapani, anona nemaf motaga mondawalap, epes hiesi sogawam. ²³ Ipe' aligah magalipei pame' basef, peme'am andeande'.” ²⁴ Ea' na'ipam wapoti' na'i, “Basef ipe' pame'ami, amama pegawam andeande'. Maim basef maloma maina waf ipe' panda'masam enis epes, ikwaf anama atona anona nemaf God nogwamepana ipe', ea' nowatanimipa anom wapoti'. ²⁵ Emi egafis sembale'efa basef Godi, nambimb God nowatanimasam wapoti'. Isima owa' sembale'ami, nambimb basef kwawie'im amama esis sembale'ami, God nondalombasam esis ea' sopan etin.”

Basef womun etina aman nowaha olelemb

²⁶ Ea' Jisas na'ipas basef womun etin na'i, “Epes siowis wambota Godi numafias, si'i anom basef womun etin dei' ae' a'ipipami. Anona aman nowaha olelemb gwa'aimi aof ananinai. ²⁷ Ea' nafi'i nape wambel na'oh owambenh hiami nape nimeguf hiami mafe' ea' olelemb amama

nawami mataga malo lu'um ma'imama? Anan ina nogawa mataga ma'imama, owa'. ²⁸ Etap atona nanda' oleleb amama mataga malo mola gwa'aimi bu'wami mail. Soh atom mali', ea' afis mataga ea' gwa'aimi mandanda' lu'um mail. ²⁹ Ea' matagama lu'um akom andeande' ea' maaf. Nema'f anama sala' gwa'aimianai nataga, aman anama nanda' maol naloma nogwatop.”

*Basef womun etina nalelef mastetim
(Mt 13:31-32; Lu 13:18-19)*

³⁰ Ea' Jisas na'iam wapoti' na'i, “Epes siowis wambota Godi numafias na'ama etin si'i main? Ae' indila'wifam si'i maim basef wamon etin? ³¹ Nalelef mastetim so'uso'umi. Ina lu'um si'i su'utip gwa'aimi lawah hiami mawam etapi, owa'. Nalelef so'uso'um endilisi. Anona aman nawam etap ³² ea' mataga malo lu'um mik-ila' gwa'aimi hiami mape aofi. Amam mataga si'i lawag lu'unai, agof mandalana mafe'agon ganigani. Ea' amiguf mafi'i mala alagah mandambaho'ma owaf mail agof.”

*Jisas na'i basef hiami womun etin
(Mt 13:34-35)*

³³ Ea' Jisas na'ipas basef womun etin si'i nali' na'ipasami. Na'ipas nendala'wifa amam-aga hiami nagil'ma gawa asasinai nafe' netambel. ³⁴ Anan ina na'ipasa anom basef alihima esis, owa'. Na'iam womun etin. Ea' nam-bimb alupumi ananimi atom malomana mape, na'ipam alihima ofagema basef womunaimi.

Jisas ninifala embel maloma uf faso'mam ma-pan

(Mt 8:23-27; Lu 8:22-25)

³⁵ Nemaŋ anama atona, wambomota fele-fele'ma owamb, Jisas na'ipa alupumi anan-imi na'i, "Afa' ofe' anama walemb lu'unai batupa'manai anama gani fisana."

³⁶ Ea' amam makwaha esis amam nematawa hiesi mafe' bot anama Jisas natumanai mofa'ana mafe'. Enis epes sofa' anom bogw maloma bot anama mafe'. ³⁷ Ea' anona uf lu'unai naluwi, naoh manda'am fepoh, mafe' mawis bot nomon ea' na'i si'inama embel. ³⁸ Ea' Jisas na'oh nalola bot nagi'ma nola komboto'w na'oh.

Ea' amam mafe' minimbalona ma'ipana ma'i, "Tisa dembinai, afa' wa'i a' owala. Ine' negawafa, owa'?" ³⁹ Ea' Jisas nohafel ninifala uf na'ipa embel naoh na'i, "Uf neloma embel ipe' petah." Ea' uf faso'mana, embel ina ata' manda' fepo. Tol motah.

⁴⁰ Ea' na'ipa alupumi anan-imi na'i, 'Ipe' umbamahepa ma main? Ipe' pembalo'a basef Godi pa'i Ae' la'ifiwei, owa'?

⁴¹ Ea' amam mati na'ama, umbamaham kwapete'am endilisi, ea' manda'ipama ma'i, "Anan emi egafuna? Na'ipa uf naloma embel mame'ana mowala."

5

Jisas natofa ambagof awami hiami mape anona aman

(Mt 8:28-34; Lu 8:26-39)

¹ Ea' Jisas nao'wa alupumi nafe' nataga anagon wa'ol walemb batupa'manai anama etap esis Gerasa sapoma. ²⁻³ Anan nakwaha bot nisila'i, mehipe anona aman ambagof awami mapeinai nafi'mai Anan. Aman anama nape na'oh la'ela'ef hi'agilif sawa epes saga'i sapoma nafi'i. ⁴ Esis sali' sombalo'ana sumafiana, sanda' seni hankap sowa'ana lagof bo'wagah la'ela'ef. Owa'etin. Anan nahape'am etin. Ina enin epen la'ifina nembalo'ana la'ifina nope, owa'. Ea' sen wapoti' ina la'ifina, owa'. ⁵ La'ela'ef owamb alip nape nafe' hi'agilif halafutagw, nafe' na'i mehipe nafe'. Nafela otamba hi'elimi natotopa' alop ananinai.

⁶ Anan ata' nati Jisas nafi'i laogon, nasagih nafi'i nindiwa nembawa notawamana. ⁷⁻⁸ Ea' Jisas nogawa aman anama ambagof awami mapeinai. Ea' na'ipam na'i, "Ipe' ambagof aopei, ipe' pekwahona pefe'."

Na'ama anan noga' na'i mehipe na'i "Jisas, ine' nogalomana Dembinai God nape ilif endilisi, ine' na'i nenda' maina ae'? Ae' a'ipina endilisi gani ilifa agel Godi, ine' owa' nese'e nimanimi ae'."

⁹ Ea' Jisas nahali'ana na'i, "Agel ine'inai emi?"

Ea' anan na'i, "Afa' ambagof aofai hiafai. Dei' agel afa'inai ambagof hiami."

¹⁰ Ea' nahali' Jisas mehipe na'i, "Ina netofafa ofe' anona etap laugoma, owa'."

¹¹ Ea' anom bogof hiami maitu ma' gwa'aimi anona domota felefele'. ¹² Ea' ambagof amama mofala Jisas ma'ipana mehipe ma'i, "Ine' netofafa ofe' uwisa bogof mamuma."

13 Ea' Jisas na'i a'e mam, makwaha aman anama mawisi mafe' mawisa bogof. Ea' bogof mamuma hiami 2,000-peleim masagih mafe' mehip mowala anagon awagoma tata mowala embel walemb batupa'manai ma' embel afum hi'alam. 14 Ea' amam mumafimi masagih mafe' ma'ipasa basef amama wambel anama lu'unai amam nematawa hiesi. Ea' ma'ipas sape aof wapoti' ma amamaga amama amam matulumi. 15 Ea' safi'mai Jisas sati aman anama fowa' ambagof awami mapeinai, dei' ambo'ona nomonas bu'wami mapeina andeande' nowaho' lowaf nape. Amam nematawa hiesi satolona ea' esis umbamahas. 16 Ea' esis sati amamaga amama sa'ipas ma amamaga amama mataga aman anama fowa' ambagof awami mapeinai. Ea' sa'ipas amamaga matagama bogof wapoti'. 17 Ea' esis hiesi sa'ipa Jisas mehip sa'i nokwaha etap anama asasima nefe' anagon. 18 Ea' Jisas nalata bot, aman anama fowa' ambagof awami mapeinai nahali'ana mehip na'i, "Ae' a'i efe' elomena."

19 Ea' Jisas ina na'i, owa'. Ea' na'ipana na'i, "Ine' nefe'ma esis wambota atona ine'inai ni'ipasa amama Dembinai nanda'minami nati uwahipina ma nanda'ena bow'ena."

20 Ea' aman anama nafe' nawalapa basef amama na'ipasam wambel 10-peleina Dekapolisa amamaga Jisas nanda'manami. Ea' esis amam nematawa gegelalasis kwapete'as ukup matamea mafe'.

Jisas nafela nogamana Jairusi kohafel kwape

bo'okw wapoti' ea' nanda' ano'w nemata'w ambo'okw

(Mt 9:18-26; Lu 8:40-56)

²¹ Jisas nofa' bot notanima nambo walemb batupa'manai anama nafe' fisana gani wa'ol, ea' amam nematawa hiesi safi'i sape satagamana. Anan nape felefele'ma akata, ²² anona aman Jairus numafi ipat esis Juda sa'i basef sapeinai nafi'i. Anan nati Jisas ea' nindiwa nembawa no-tawamana, felefele'ma bo'wagah ananimi. ²³ Ea' na'ipana mehip na'i, "Nogame ae'akwi felefele' kwa'i koga'. Ae' a'i ine' nefe' newamona lagel ine'inai akwa'w ambal notanimai nuwisa'w kohafel kopan."

²⁴ Ea' Jisas nalomana mafe'. Ea' amam nematawa hiesi safe' sagi'mam sanda' gwagwasi'ma etin saitu sindiwapana.

²⁵ Ea' ano'w nemata'w kwape kwalomas, awes lu'unai nanda'akwi kwape gamba la'ela'ef afagof 12-peleim. ²⁶ Akwa'w kwafe'ma dokta hiesi sase'akw nimanimi, ea' kwakwaha otamba akwa'umi hi'alama dokta isima hiesi ma senda'akw bo'okw, owa'etin. Awasi'w kwape na'ama la'ela'ef. ²⁷ Ea' kwame' basefa Jisas nafela enis epes awes nanda'asi ambo'wes. Ea' kwaloma amam nematawa hiesi kwafi'i alafuga Jisasi kwahapila lowaf ananinai. ²⁸ Dei' main, akwa'w okom na'i, "Ae' esa lagela lowaf ananinai, ae' bo'awe."

²⁹ Kwahapila lowaf ananinai etin mehip esimbel pele'atam ea' kwame' alop akwa'unai nataga bo'ona. ³⁰ Dei' atef Jisas name' alop ananinai

kwofalina, name' anona pepel ananinai nakwahona nafe'ma nanda' enin epen bo'wen. Na'ama nandamboma la'afena esis hiesi na'i, "Emi nasa lagela Ae'?"

³¹ Ea' alupumi ananimi ma'ipana ma'i, "Ine' natilis o owa' amam nematawa isima hiesi saitusa sanda' gwagwasi'ma etin salomafa? Dei' maina ine' ata' na'i, 'Emi nasa lagela ae'?' "

³² Ea' Jisas nandamboma natologon na'i niti epen inima nahapilani. ³³ Ea' nemata'w akwama kogawa amamaga amama matagama'wi, ambo'okw ea' umbamaha'w kwapete'akw. Ea' kwafi'i kwindiwa nembawa kotawa felefele'ma Anan, kwawalapa amamaga kwa'iam alihim.

³⁴ Ea' Jisas na'ipakw na'i, "Nemata'w, ine' nembale'efa ae' la'ifiwei. Amama atom dei' anda'ena bo'wena. Ine' fo'lo, opaf ine'inai nope awanena. Esimbel ine'imi fataom, dei' awes ine'inai ahi'alana."

³⁵ Jisas ata' na'ipakw etin, nati anom amam makwaha ipat Jairusi mafi'i ma'ipa Jairus ma'i, "Nogamena ine'ikwi kwaga' ea'. Amama atom dei' ina nenda' Dembinai Tisa nofo'lo ekep pehana, owa', hapainai."

³⁶ Ea' Jisas ina nembe' aligah name'amam basef amama amamumi, owa'. Ea' na'ipa Jairus na'i, "Ina umbamehena, owa'. Nembale'efa Ae' la'ifiwei."

³⁷ Ea' Anan ina na'i a'e ma amam nematawa hiesi solomana siowis ipat anama, owa'. Anan nao'wa Pita Jems naloma owalomana Jon amam atom mawis malomana. ³⁸ Mafe' mataga ipat Jairusi, Jisas nati esis salef mehip sa'i sapoma'w kwapete'as.

³⁹ Ea' nawis nomon na'ipas na'i, "Dei' maina ipe' palef patapea kwapete'epa? Akwa'w ina kwaga' endilisi, owa'. Kwa'oh etin."

⁴⁰ Ea' esis sanda' iafana kwapete'as ama na'iam na'ama. Ea' nagalo'ma esis sawisi ande'. Anan nao'wa ahaloma'w naloma mama'wakw saloma alupumi ananiami mape malomanai, esis etis safe' sawis nomon awani inima naga' na'oma. ⁴¹ Ea' nahapila lagel akwa'unai na'ipakw na'i, "Talita kumi." Ape' mamboma basef amama ma'i, "Nemata'w sa'ukwi, ae' a'ipina, ine' dei' hafel."

⁴² Ea' mehip nemata'w akwama afagof 12-peleim mahape'akwi kohafel kwafe' esis satolo'w, sohafel gegelalasis kwapete'as.

⁴³ Ea' Jisas na'ipas mehupa siela basef ananiami na'i, "Ipe' ina pi'ipa enin epena amamaga amama, owa'."

Ea' na'ipa esisa sese'akwa anom gwa'aimi kogwa'am.

6

Esis Nasaretisi sowa' alafugaha Jisas

(Mt 13:53-58; Lu 4:16-30)

¹ Jisas nohafel nakwaha wambel anama nafe' wambel ananinai ofagama Nasaret naloma alupumi ananiami. ² Nema'f anama sapoma noma'wanai sa'i Sabat nataga, nafe' nawis ipat esis Juda sa'i basef sapeinai na'ipasa basef Godi amam nematawa, same'ana sohafel gegelalasis sa'i, "Aman anama nofa' basef amama eti? Emi nase'ana gawa anama? Emi nagiambamana ma dei' nanda' pepel anama si'i God nanda'anai?"

³ Ape' magawa aman anama fowa' nanda' kamda nala' ifagw. Anan Maria nogaloma'w atona, nape wambeli. Anan sahalomam Jems naloma Josep, Judas naloma Saimon. Henitiamana ananiwai wape walomapa na'ae.”

Esis sa'iam na'ama opalef aoma anan, ea' sowa' alafughana.

⁴ Ea' Jisas na'ipas na'i, “Anona profet nofa' agel lu'unai anona wambel, sa'i anan dembinai safela agel ananinai sombale'efana. Ea' ina nofa' agel lu'unai wambel ananinai ofagama, wambota ananinai sapoma, owa'.”

⁵ Na'ama Anan ina nanda' anom amamaga la'ifimi wambel anama, owa'. Anan nasa lagofa enis awes nanda'asi atona etin nanda'as bo'wes. ⁶ Amam nematawa wambel Nasaretisi owa' sembale'efa Anan. Na'ama Anan nomonas matamea mafe'.

Jisas nase'ama maol alupumi ananimiti 12-peleim

(Mt 10:5-15; Lu 9:1-6)

Ea' Jisas nakwaha wambel ananinai Nasaret nafe' na'ipasa basef Godi amam nematawa wambel hiagoma nape felefele'i. ⁷ Ea' nofala alupumi ananimiti 12-peleim mafi'mai Anan ea' nase'am agof lu'wami nanda'am la'ifima meatofa ambagof awami, ea' nasapa'am mafe' biam atom. ⁸⁻⁹ Na'ipam na'i, “Ipe' ina pefa' gwa'aيمي isalef moni molomepa, owa'. Ipe' pela su pehapila bandefah pendahe'amon pefe'. Ina pefa' siogw biam atom, owa'. Pefa' atona etin mondondaepa.”

¹⁰ Ea' na'ipam wapoti' na'i, "Ipe' pefe' petaga anona wambel, i'i enis si'i a'e ma pefe' pi-owis ipat asasinai, ipe' pepe ipat anama atona palomas. Ea' pekwahona pehafel pefe'. ¹¹ I'i anona wambel owa' sofa'epa pefe' ifagw asasimi some' basef ipe'imi, ipe' penda'am na'ama. Pekwaha wambel anama pindilama nombol mail bo'wagah ipe'imi ma sitilipa sogawa waf aonai ofagena asasinai atona."

¹² Ea' nasapa'am mafe' biam atom makwaha basef ma'i, "Ipe' pewa' alafugaha waf aonai, pemboma opalef pefe'ma God."

¹³ Ea' matofa ambagof awami mape epesi. Ea' mofa' wel bu'wami makolo'ma esis awes nanda'asi hiesi sataga bo'wes.

Aman anama Jon napisi'as embeli fowa' Herot nahana naga'

(Mt 14:1-12; Lu 3:19-20; 9:7-9)

¹⁴ Dei' anona gavman king Herot name' basefa maol anama Jisas nali' nanda'anai. Dei' main, agel Jisasi nataga lu'una nafe'agon hi'alagon. Ea' enis amam nematawa sa'i, "Jon napisi'as embeli dei' nohafel wapoti' nape la'ifina nanda' maol si'i God nanda'anai."

¹⁵ Ea' enis epes sa'i, "Anan profet Elaija fowa'inai."

Ea' enis sa'i, "Anan anona profet si'i profet amama fowa' ganimi."

¹⁶ Gavman anama king Herot name' na'ama ea' na'i, "Jon fowa' ae' atopa' bagato'wana, ea' dei' notanima nohafel wapoti' nanda' maol Jisasi."

¹⁷⁻¹⁸ Fowa' Herot nali' naso' nemata'w owalomanana Filipi agili'wa Herodias. Ea' sahalomana

Herot nandalombana'w. Ea' Jon nati waf anama na'ipana na'i, "Ine' naso' nemata'w sahalome-nai, ea' nawala mi'uli Godi. Na'ama ina ande-ande', owa'."

Ea' Herot nasapa' anom amam mafe' mom-balo' Jon mofa'ana mafe' manda'ana nanda' kal-abus. ¹⁹⁻²⁰ Ea' Herodias kwame' basef amama, okom aona endilisi ma Jon, kwa'i kohana afuna, ea' owa'etin. Herot anan umbamahanama Jon ea' numafiana andeande'. Amama atom akwa'w ina la'ifikwa kohana neaga', owa'. Herot no-gawa Jon aman bu'unai Godi. Nema'f anama anan name' basef Jon na'ipanami, anan nomonas matamea, ea' umbamahana. Anan okom na'ina'i endilisi ma neame' basef ananimi.

²¹ Ea' dei' Herodias kwagolopa anona eaf ma kohana neaga'. Herot nanda' anom gwa'aimi lu'wami ma okom nopoma nema'f anama mama'wana kolana. Anan nanda' gwa'aimi lu'wami ma anom dambami magiambamana ma maol gavmani maloma anom dambami mumafi amam soldia maloma anom dambami mape etap hiagoma Galili. ²² Ea' amam dambami maloma Herot mape ma' gwa'aimi, ano'w nemata'w sa'ukwi awiawai'wi kwawisi nomon kwaitu kwalemb. Akwa'w Herodias nogama'w. Ea' Herot naloma amam dambami ukup maimaila akwa'w endilisi. Ea' na'ipakw na'i, "Ine' na'i ae' ese'ena maim amamaga? Ine' ni'ipiam ae' ma ese'enam."

²³ Ea' Herot na'iam endilisi gani ilif na'i, "I'i ine' nihali' ae' ma ease'ena anom amamaga ine', ae' ese'enam. Ea' ine' ni'i ae' eawala amamaga ae'ami hiami ma'oh anama iliakwagoma

ese'ena tu'wanim, ae' a'i a'e ma ese'enam. Ine' tu'wanim, ae' tu'wanim, dende'am etin.”

²⁴ Ea' akwa'w kwawisi ande' kwafe' kwahali' mama'wakw akwa'ukwi kwa'i, “Ae' atuwasi i'ipa Herot efa' maim amamaga?”

Ea' mama'wakw kwa'ipakw kwa'i, “Ine' ni'ipana ni'i nefa'ai balaga Jon napisi'as embeli.”

²⁵ Ea' kwandamboma kwawis nomon mehup kwahali' Herot kwa'i, “Dei' atef ae' a'i ine' neha Jon napisi'as embeli noga' netopa' balaga nola anona plet nefa'anai nese'eana.”

²⁶ Akwa'w kwa'iam na'ama, opaf Heroti ni-manina endilisi. Ea' anan okom na'i basef endilisi gani ilif na'iam la'ifimi ea' amam nematawa hiesi sape salomana sa' gwa'aimi same'ana. Ea' ina ata' nosambala basef akwa'umi, owa'.

²⁷ Mehup Herot nasapa' anona soldia nafe'ma noha Jon noga' nofa' balaga nafi'i. Soldia anama nafe' ipat sanda' kalabusanai natopa' bagato'w Joni nofa' balaga ²⁸ nala anona plet nofa'ana nafi'i naso' Herodias nogama'w kofa'ana kwafe' kwase' mama'wakw. ²⁹ Ea' alupumi Joni mame' basef amama, mafi'i mofa' alop si'ina mafe' mawana hi'agif.

*Jisas nase'as gwa'aimi epes hiesi 5,000-peleis
(Mt 14:13-21; Lu 9:10-17; Jo 6:1-13)*

³⁰ Amam Aposel Jisasi dei' motanima mafi'i mandakolas malomana. Ea' mape manifa maol mafe' manda'anai ma'ipana basef hiami amam ma'ipasami. ³¹ Enis amam nematawa hiesi safi'i safe' ea' Jisas naloma alupumi ananimi ina ata' anona nogotama meagwa' gwa'aimi, owa'.

Na'ama Jisas na'ipam na'i, "Wale, afa' atofa ofe' anagon wafiguma ma ata' tol opoma noma'w."

³² Ea' mofa' bot mafe' anama wafiguma epes a'agoma, amam atom mafe'. ³³ Owa'etin. Esis amam nematawa hiesi sogawa amam mafe'ma. Ea' esis hiesi sakwaha wambel hiagoma asasima sasagih safe' anama ea' sali' sataga anama amam ma'i meafe'ma. ³⁴ Ea' Jisas nafe'ma nisila' akata, nati esis hiesi. Natilis ina anona aman nape numafias, owa'. Esis sape si'i sipsip owa' enin epen nimafiase, ea' nati esis uwahipis nawalipasa basef bu'wami hiami. ³⁵ Wambomota felefele'ma owamb alupumi ananiami mafi'i ma'ipana ma'i, "Afa' wape na'ae wafiguma ea' wambomota felefele'ma owamb. ³⁶ Ine' nesapa'as sofo'o wambel aof asasinai deindei sape felefele' setala gwa'aimi maim sea'am."

³⁷ Ea' Jisas nagwamam na'ipam na'i, "Ipe' etipa pese'as gwa'aimi."

Ea' ma'ipana ma'i, "Ine' na'i afa' ofe' utalai bret ama 200 kina ose'esam? 200 kina otamba amama dondo' ma epen nenda' maol aomb 8-peleim nofa'am."

³⁸ Ea' Jisas nahali'am na'i, "Ipe' bret ma'ufina na'oh? Ata' fo'o petolona."

Ea' mafe' matolona ma'i, "Bret lagel wa'ana atona naloma agof biam hi'imi ma'oh."

³⁹ Ea' na'ipam na'i, "Ipe' pi'ipa esis amam nematawa sope sefe' oto otowa otalef bu'wami."

⁴⁰ Ea' sape safe' si'i amam ma'ipas, enis sataga 100-peleis, enis 50-peleis, na'ama etin.

⁴¹ Ea' Jisas nafela bret anama wa'ana atona

naloma agof biam naniga nati heven ilif nanifela God. Ea' nawalana nasol' alupumi ananimi mafe' maso' esis amam nematawa hiesi hi'alas. Ea' nafela agof wapoti' nawalom nase'am mase'asam. ⁴² Esis sa'am elihis hi'alas. ⁴³ Ea' alupumi ananimi matatama tukwakwanimi ma'ihhi maolo'wam holalef lu'wami 12-peleim bret anama. ⁴⁴ Esis amam nematawa sa' gwa'aimi amama epes hiesi. Seamba amam atom mataga 5,000-peleim.

Jisas natoma nafe' embel ilif
(Mt 14:22-33; Jo 6:15-21)

⁴⁵ Dei' atef Jisas nasapa' alupumi ananimi mofa' bot mali' mafe' walemb batupa'manai lu'unai anama mambo fisana mafe' Betsaida. Ea' nasapa' amam nematawa hiesi safe' deindei. ⁴⁶ Nasapa'as safe', anan nandowasa' halaf nape na'i nonda' beten. ⁴⁷ Wambomota alupumi ananimi mape bot ata' mala walemb batupa'manai lu'unai la'afen. Ea' Jisas atona naitu akata. ⁴⁸ Ea' nati uf lu'unai nalo nafi'i anama amam ma'i meafe'ma, ea' nakoto'ma amam manda' pul masasapa' bot ekep paham endilisi. Owamb ata' nail etin felefele'ma leala, Jisas nailam natoma embel ilif nafe'ma amam. Ea' na'i nikila'am nefe'. ⁴⁹ Ea' mati anan naitu nafi'i embel ilif ea' ma'i anona gamba nailam nafe', ea' manda'am wi ge' ma'oh kwapete'am. ⁵⁰ Dei' main, amam hiami matolona ea' gegelalasom. Ea' mehip Jisas nalomam na'i, "Ipe' la'ifipa, umbamehepa owa'. Ae' atowe ma'uwi ailipa afi'i."

⁵¹ Ea' nalata bot nape nalomam, dei' atef uf faso'mana opalef amamumi gegelalasom

kwapete'am endilisi, ea' mape ukup matamea mafe'. ⁵² Dei' main, amam ina ata' ukup mape andeande'ma mogawa basef ofagema ma bret anama Jisas nase'asama esis hiesi sa'am, owa'. Ukup amamumi mase'am.

Jisas nanda' awes nanda'asi hiesi ambo'wes hi'alas anona etap lu'wagoma Genesaret (Mt 14:34-36)

⁵³ Jisas naloma alupumi ananiami mowala mambo walemb batupa'manai anama mafe' mataga anona etap lu'wagoma Genesaret. Ea' mowa' bot nail, ⁵⁴ misila'i mafe' ea', esis mehipe sati Jisas ea' sagawana. ⁵⁵ Ea' sasagih safe' anama hiagoma ganigani. Esis same' basefa Jisas napoma, ea' sefa' awes nanda'asi bal-atagw sofa'as safi'mai anan. ⁵⁶ Wambel hiagoma lu'wagon sa'ogon, naloma anama hiagoma Jisas nafe'ma, esis sambe' isima awes nanda'asi sa'oh la'afen. Ea' sofala Jisas mehipe ni'i a'e ma isima sohapila lowaf ananinai da'malifinama atona. Ea' emi egafis sahapilanai sataga bo'wes wapoti' hi'alas.

7

Basef mi'uli Godi mikila' basef bafasas ehasas sawalipasami (Mt 15:1-9)

¹ Amam Farisi maloma anom mawalipasa mi'uli Godi, makwaha Jerusalem mafi'mai Jisas malipana. ² *Ea' mati anom alupumi Jisasi ma' gwa'aimi owa' mosa'opa lagof mea' gwa'aimi si'i

* 7:2: Lu 11:38

amam Farisi ma'iam, owa'. Ea' amam Farisi ma'i alupumi Jisasi lagof amamumi alogw mailam.*
³ Dei' main, amam Farisi maloma esis Juda hiesi hi'alas saila mi'uli anama esis akupasi. I'i esis sesa'opa lagof andeande', sea' gwa'aimi. I'i owa', owa'. ⁴*Esis safe' maket setanima sifi'i, ma owa' sesa'opa lagof, ina sea' gwa'aimi, owa'. Esis saila mi'uli hianai naninani si'i mi'uli anama sofa'ana akupas asasisi. Sasa'opa kahi sospas, dis saloma belegw atom ama saila mi'uli akupasi.

⁵ Na'ama amam Farisi maloma amam mawali-pasa mi'uli Godi mahali' Jisas ma'i, "Dei maina alupumi ine'imi owa' mila mi'uli amam akupami? Lagof amamugumi alogw mailam magwa' gwa'aimi."

⁶ *Ea' Jisas na'ipam na'i, "Fowa' gani profet Aisaia nendela'wifa ipe' endilisi, ipe' pa'i basefa malogof biamipei. Anan nanda'am andeande' dende'ma ipe' na'iam na'ama na'i,

God na'i,
 'Amam nematawa isima safela agel ae'anai lu'una malogof asasimi atom, ea' opalef asasimi mape laogona ae'. Ukup asasimi ina sembale'efa Ae', owa'.

⁷ Esis ina sawalipasa basef ae'ami, owa'. Esis sawalapa mi'uli epes sape etapi, sambaso'mas sa'i, "Mi'uli anama basef Godi." Ea' sanda' lotu safela agel ae'anai etin.' "

⁸ Ea' Jisas na'ipam wapoti' na'i, "Ipe' pakwaha mi'uli Godi ea', dei' paila waf epes sape etapi atona la'ifipa."

* 7:2: Niti futnot Matyu 15:2.
 29:13

* 7:4: Mt 23:25

* 7:6: Ais

⁹ Ea' na'ipam na'i, "Ipe' pegawa andeande' pa'i penda' waf bu'unai atona, owa'etin. Dei' pesambala mi'uli Godi ma paila waf ipe'inai atona. ¹⁰ *Fowa' gani Moses nawalipasa mi'uli anama na'ipas na'i,

'Ipe' pinifela mamasepa ipe'isi pembale'efas pi-giambamas.' Anom wapoti' na'iam na'i, 'Emi egafis si'i basef awamima ahapas mamasas asasisi, isima enis epes sohas soga.'

¹¹ Ea' ipe' pambaso'am pa'i anom basef na'ama pa'i, Emi nindaiwa'ma nigiangbama mamasan ni'ipas ni'i, 'Otamba maim ae'ami andaiwa'ma ease'epam, ae' andandepama ease'anam God.'†

¹² Ea' ipe' Farisi paloma ipe' pawalipasa mi'uli Godi, ipe' pa'i a'e ma epen inima nembaso'ma mamasan, ea' ina nagiangbamas, owa'. ¹³ Na'ama ipe' paila mi'uli fowa' gani pefa'ana akupipa ipe'imi, panda' waf anama pesambala basef amama Godi na'i ape' migiangbama mamasapa. Ea' panda' waf ipe'inai atona panda' waf aonai la'ela'ef na'ama ina andeande', owa'."

Amamaga awami mape opalef ape' epesi maw-isi ande' manda'apa aopa

(Mt 15:10-20)

¹⁴ Ea' Jisas nofalai amam nematawa hiesi wapoti' safi'mai anan ea' na'ipas anom basef womun etin na'i, "Ipe' hipei peme' basef ae'ami okokomam pegawam andeande'. ¹⁵ *Amamaga

* **7:10:** Eks 20:12; Eks 21:17; Diu 5:16 † **7:11:** Amamaga amama esis Juda sandandepama sease'anam Godi, esis sa'i isima Korban. Waf asasinai na'ama. Esis ina sose'anam enin epen, owa'. Sese'anam God atona. * **7:15:** Ap 10:14-15

gwa'aimi maim ande'ami ipe' pegwa'am mowala mape nomon, amama ina monda'epa awepa, owa'. Ea' amamaga mape ukup ipe'imi nomon mawisi ande', amama atom manda'epa awepa. [16 Ipe' aligah magalipei, ipe' peme' basef amama.]”

Ea' Jisas na'ipas na'ama, ¹⁷ nakwaha amam nematawa isima hiesi nafe' nawis ipat. Ea' alupumi ananiami atom mape mahali'ana ma basef amama ofagema womun etin do'ok na'ipasami. ¹⁸⁻¹⁹ Ea' na'ipam na'i, “Ipe' ina ata' pegawa! Amamaga gwa'aimi maim mape ande'i ina monda'epa awepa, owa'. Gwa'aimi amama sa'am mowala opalef nomon ea' mafe' sakam mafe' mowala dowah. Ea' ukup ipe'imi ina aom, owa'.”

Jisas na'ipasa basef amama na'i, “Gwa'aimi mamumami hiami hi'alam bu'wami atom mogwam.”

²⁰ Ea' na'ipam wapoti' na'i, “Amamaga mape epes opalef nomoni, ukup awami maim mataga ande', amama atom manda'epa awepa. ²¹ Amamaga awami mape ukup nomon epesi mawisi ande' na'ama. Waf naninani aonai, ukup awami, waf sanda' so'a waulanai, wal, soha enis seaga'i, ²² sohambombaga waf dase'amainai, waf kowalasanai, waf sa'i sofa' amamaga hiami ma esis etis, baso'amunai naninani aonai, sesambala basef, simbisambas, sa'i basef awami, ukup aoma enis epes, findiwa, safela agof اساسimi atom lu'um, waf gawa a'anai. ²³ Waf anama naninani aonai, anama nape nomon ukup epesi nawisi ande' nanda'epa awepa.”

*Nemata'w Finisiai'wi kombale'efa Jisas
(Mt 15:21-28)*

²⁴ Ea' Jisas nohafel nakwaha wambel anama, nafe' Tair nafe' nawis anona ipat. Anan nandaiwa'ma enin epen negawa anan nape na'ama. Owa'. Anan ina nandambaho'.

²⁵ Ea' ano'w nemata'w kwame' basefa anan nape na'ama. Nemata'w akwama nogama'w akwa'ukwi sa'ukwi ambal aonai napai'w. Ea' mama'wakw mehip kwafi'mai Jisas kwindiwa nembawa kotowa felefele'ma bo'wagah ananiami.

²⁶ Akwa'w Finisiai'wi anona etap hiagoma Siria. Akwa'w ina Judai'wi, owa'. Kwa'i diga Griki. Ea' kwahali' Jisas mehipa netofama'wa ambal aonai nape nogama'w akwa'ukwi.

²⁷ Ea' na'ipakw anom basef womun etin na'i, “Ape' ata' mose'asa gwa'aimi awasi ape'isi sili'. Ape' ina mofa' gwa'aimi awasi ape'isi makwahom mafe'ma nombagw,‡ owa'.”

²⁸ Ea' akwa'w kwagwamana basef Anan kwa'i, “Dembina, ine' na'i endilisi. Ea' nombagw mafe' owina tebol matatama gwa'aimi mowa etapi magwa'am.”

²⁹ Ea' Jisas na'ipakw na'i, “Ine' na'iam na'ama andeande'. Ea' tanima fo'o. Ambal aonai nakwaha nogamena ine'ikwi nawisi nafe' ea'.”

³⁰ Ea' akwa'w kotanima kwafe' ipat akwa'unai, kwati nogama'w akwo'ukwi tol kwa'oh lahis, ambal aonai nakwaho'w nawisi nafe'.

*Anona aman aligah maloma malogel
mase'anai, Jisas nanda'ana bo'ona*

‡ 7:27: Niti futnot Matyu 15:26.

³¹ Dei' Jisas nohafel nakwaha wambel Tair, ea' nafe' nawis la'afena wambel Saidon. Ea' nakwaha Saidon nafe' etin nataga walemb batupa'manai lu'unai Galili ea' nafe' la'afena wambel 10-peleina Dekapolis. ³² Ea' esis sao'wai anona aman nafi'mai Jisas, aligah mase'ana afega ananinai dindigina. Ea' ina na'i andeande', owa'. Na'ama esis sofala Jisas ma nesa lagela anan nonda'ana bo'ona. ³³ Ea' Jisas nao'wana amam biam mafe' makwaha esis amam nematawa hiesi amam atom mape. Ea' nasapa' faguf biam ananimi mawis aligah aman anama, wa'owa'ol. Ea' nisi'waf nasa faf afega aman anama, ³⁴ ea' Jisas naniga nati heven ilif, okom Ananinai nataga mehipe, na'iam na'ama diga Hibruinai na'i, "Efata." Basef ofagema amama ma'i, "Ine' aligah mogal neme' basef ni'iam andeande'."

³⁵ Ea' aligah magal, afega anainai nataga bo'ona ea'. Dei' na'i andeande'. ³⁶ Ea' Jisas na'ipas na'ama esis ina si'ipasa amamaga amama ma enin epen. Nape na'ipasa basef la'ifimi timbitambel. Owa'etin. Esis sawalagam sa'ipasam timbitambel seme'am.

³⁷ Ea' esis gegelalasis endilisi sa'i, "Amamaga hiami Anan nanda'ami nanda'am bo'om etin. Anan nanda' esis aligah mase'asi same' andeande', esis malagof mase'asi sega sa'i andeande'."

8

*Jisas nase'asa gwa'aimi epes 4,000-peleis
(Mt 15:32-39)*

¹ Anona nemaf amam nematawa hiesi sandakolas wapoti' sa'i seme' basef Jisasi. Ea' esis gwa'aimi a'as. Na'ama Jisas nofala alupumi ananiami mafi'i na'ipam na'i, ²⁻³ “Ae' ati esis amam nematawa isima uwahipis. Esis sape salome nimeguf wanom gwa'aimi a'as nolomahas endilisi. I'i ae' esapa'as sefe' etin utagw wambel asasima, siti noga atona sowa so'oh sofe' eaf. Enis safi'i laogoma.”

⁴ Ea' alupumi ananiami magwamana basef ma'i, “Anae' wafiguma epes a'agoma. Atuwasi afa' ofa'ai bret eti weaso' amam nematawa isima hiesi sea'am? Afa' bret ina hiana, owa'.”

⁵ Ea' Jisas nahali'am na'i, “Dei' ipe' bret ma'una na'oh?”

Amam ma'i, “7-peleina na'omafa.”

⁶ Ea' na'ipa esis amam nematawa sape etap, Anan nafela bret 7-peleina, nanifela God nawalona naso'am alupumi ananiami ma mase'asam esis amam nematawa hiesi. Amam mase'as hi'alas dende'. ⁷ Ea' anom agof sa'umi hi'imi wapoti' ma'oh. Ea' Anan nafelam nanifela God, naso'amam mese'as wapoti'. ⁸ Ea' esis sa'am, dondo' elihis. Ea' alupumi ananiami matatama tukwakwanimi ma'ihhi makolasam maolo'wam holalef lu'wami 7-peleim. ⁹ Amam nematawa sa' gwa'aimi amama sataga hies seamba amam atom mataga 4,000-peleim. Ea' Jisas nasapa'as safe' ¹⁰ ea' mehip Anan nalata bot naloma alupumi ananiami mafe' anona etap lu'unai Dalmanuta.

Amam Farisi ma'i miti anona pepel si'i God atona nanda'anai

(Mt 16:1-4; Lu 12:54-56)

¹¹ Ea' amam Farisi mafili ma'i basef mandahihanamam maloma Jisas. Amam ma'i mogwambana ma muti anona ikwaf la'ifinai. Na'ama ma'ipana ma'i anan nonda' anona ikwaf la'ifinai si'i God nape heveni nanda'anai. Amam ma'i anan nihi'ambamama anan nape pepel Godi ma dei' nanda' amamaga amama. ¹² Ea' Jisas name' ambal ananinai nemanina ea' na'i, "Dei' maina ipe' amam nematawa dei' pape etap anae' pa'i piti anona ikwaf la'ifinai? Ae' owa'etina enda'ana pitolona, owa'."

¹³ Ea' nakwaha amam notanima nalata bot nafe' fisana.

Basef womun etina yis Farisi maloma yis Heroti ma'i basef baso'maimi amamumi

(Mt 16:5-12)

¹⁴ Amam alupumi Jisasi ukup mase'ama mofa' bret hianai nolomam. Amam mofa' atotona nala bot ¹⁵ Ea' Jisas naumbalom na'ipam na'i, "Ipe' pindumafuma andeande' ma yis amama amam Farisi maloma yis Heroti."

¹⁶ Ea' mame' Anan na'iam na'ama, manda'ipama ma'i, "Afa' ukup mase'afa bret na'ihhi dei' na'ipafa na'ama."

¹⁷ Ea' Jisas nogawa basef amamumi na'ipam na'i, "Dei' maina ipe' pa'i, 'Ipe' bret a'epa?' Al'i ipe' ukup mase'epa, owa' ata' pegawa? ¹⁸ Ipe' naep mati, ea' ipe' owa' ata' piti anom amamaga. Ea' aligah mapeipa, ea' ipe' ine' peme' basef, owa'. Ukup mase'epa. ¹⁹ Nimbewa' awala

bret 5-peleina ma epes isima 5,000-peleis, ama tukwakwanimi ma'ihhi pakolasom paolo'wam holalef ma'um si'im?"

Ea' amam ma'i, "12-peleim."

²⁰ "Ea' nimbewa' awala bret 7-peleina ma tukwakwanimi ma'ihhi patatamam paolo'wam holalef ma'um si'im?"

Ea' amam ma'i, "7-peleim."

²¹ Ea' Anan na'ipam na'i, "Ipe' dei' ina pegawa, ata' owa'."

Jisas nanda' anona aman naep mase'anai Betsaida ambo'ona

²² Amam mafe' mataga Betsaida, sao'wamanai anona aman naep mase'anai nafi'mai Jisas ea' sa'ipana mehpa nesa lagel ananinai nonda'ana bo'ona. ²³ Ea' nahapila lagel anan naep mase'anai, nofa'ana nakwaha wambel nawis ande' nisi'wafa naep ananinai, nasa lagela anan nahali'ana na'i, "Ine' nati ambasif o ata' owa'?"

²⁴ Ea' aman anama natologon na'i, "Ae' ati enis epes ea' atilis si'i lawah mafe'."

²⁵ Ea' Jisas nasa lagel wapoti', naep ananinai dei' mataga bo'om, natologon andeande'.

²⁶ Ea' Jisas nasapa'ana nafe' ipat ananinai na'ipana na'i, "Ine' owa' nefe' niwis wambel ni'ipasa ae' anda'ena ambo'wena, owa'. Ine' nefe' usi'ina ipat ine'inai."

Pita na'i Jisas anan aman anama God nandan-depana nasapa'ana nafi'i esis sa'i Krai
(Mt 16:13-20; Lu 9:18-21)

27 Ea' Jisas nohafel naloma alupumi ananiami mafe' felefele'ma wambel hiagoma Sisaria Filipai. Amam mafe'ma eaf, nahali'am na'i, "Esis amam nematawa sa'i ae' aman emi egafuwi?"

28 Ea' amam ma'ipana ma'i, "Enis sa'i ine' Jon aman napisi'as embeli. Ea' enis sa'i ine' Elaija. Ea' enis sa'i ine' enina profet, fowa'inai."

29 Ea' nahali'am na'i, "Dei' ipe' pa'i ae' emi egafuwi?"

Ea' Pita nagwamana na'ipana na'i, "Ine' Kraiss, God nandandepena nasapa'ena nafi'i."

30 Ea' na'ipama basef la'ifimi na'i, "Ipe' ina pewalapa ae' pi'ipa enis pi'i ae' Kraiss, owa'."

Jisas na'ipasa nofa' nimaniami ma noga' nohafel wapoti'

(Mt 16:21-28; Lu 9:22-27)

31 Ea' Jisas nasefela basef ananiami nawalipam na'i, "Ae' ataga epen endilisiwei, nambimb agufumi Judai mose'e nimaniami lu'wami. Amam moloma amam pris dambami moloma amam dambami mawalipasa mi'uli Godi. Nambimb mondaiwa'me mose'e alafugah mohe ega' ma nimeguf biam ea', meafe'ma wanomi ehafel wapoti'."

32 Anan nawalapa basef amama alihima amam. Ea' Pita nofa'ana nelefata nasa gamba ea' na'ipana basef la'ifimi ma basef amama Jisas na'ipasami. 33 Ea' Jisas nandamboma nati alupumi ananiami, nanda' megahaha Pita na'i, "Ine' si'i Satan. Dei' main, ine' owa' okom nopoma okom Godi. Ukom ine'inai si'i ukup epes sape etapi etis. Si'amae nefe' alafuga ae'anai."

³⁴ Ea' Jisas nofalai esis amam nematawa hiesi safi'mai Anan saloma alupumi ananiami na'ipas na'i, "I'i emi egafis si'i sila Ae', esis ata' seho'ofa ukup asasimi atom mowala, sefe' owin ama God ea' ina umbamahasa enis epes sohas sogal, owa'. Ae' efa' nimaniami ma anda' maol Godi nambimb sehe ega' lawag usi'inai tu'wanainai. Epes isima senda'am na'ama etin si'i Ae' ma sigi'ma ae'. I'i owa', owa'etin. ³⁵ Emi egafis ukup mopoma ambagof asasimi atom, si'i sihapilam tatala'im, anona nemaf ambagof asasimi higililam. Ea' emi egafis ukup mopoma ae' eloma basef bu'wami Godi ma sesambala ambagof asasimi etap anae', anona nemaf God nofa'as sotaniamani sopan andeande' la'ela'ef hihif. ³⁶ Emi egafis senda' maol naninani sofa' gwa'aimi wiga amamaga hiami etapami atom hegialalami, esis wapoti' hegililas solomam. Dei' amamaga amama anona nemaf migiambamas mi'imama? Owa'etin. ³⁷ Epes isima anona nemaf sofa' amamaga maima seatala ambagof asasimi ma sitanima sowambilami wapoti'? Owa'etin. ³⁸ Ae' ataga epen endilisiwei. Amam nematawa dei'isi sanda' waf aonai sakwaha sombale'efa God. Emi egafis ambagof aoma ae' sondafa'me eloma basef ae'ami, anona nemaf ae' wapoti' ambal aona epes isima endafa'mas nemaf anama ae' ifi'i eloma amamaga bu'wami la'ifimi mafi-fili Ahalomei elomai amam ensel bu'wami Godi wapoti'."

9

¹ Ea' Jisas na'ipa esis na'i, "Ae' a'ipipa endilisi,

enipa paitu na'ae nambimb ina pega' ulal, ata' owa'. Enipa piti pepel Godi nifi'i ma epes hiesi siowis wambota Ananinai numafias.”

Alop Jisasi nataga nandati na'ana, nafifil endilisi

(Mt 17:1-13; Lu 9:28-36)

² Nimeguf wanom wanom mafe'ma ea', Jisas nao'wa Pita naloma Jems naloma Jon nao'wam mondowasa' anona halaf launai. Nao'wa amam atom mape, ea' mati alop Ananinai nandati na'ana nafifil endilisi. ³ Luwaguf maim ananimi mataga afitim endilisi. Ina anona aman etapanai la'ifina nanda' luwaguf maim mataga efitim na'ama, owa'. ⁴ Ea' mati amam biam fowa'imi, Elaija naloma Moses mataga maitu ma'i maloma Jisas. ⁵⁻⁶ Pita naloma Jemsi Jon umbamaham endilisi, ea' Pita na'i nie'iami anom basef, ea' anan ina ata' okom napoma basef na'i ni'iami, owa'. Ea' na'iam na'ama na'i, “Dembinai Tisa, afa' wape na'ae andeande'. Ata' ola' anom aolah wanom, mondandafa. Ine' anona, Moses anona, Elaija anona.”

⁷ Ea' anom elagw maofeniam. Ea' anona malogel na'i natagai elagw amama na'i basef na'i, “Anan Nogalome ae'anai, Ae' okom nohafel nainailana endilisi. Ipe' peme' basef ananimi.”

⁸ Dei' atef alupumi Jisasi wanom matologon mehipe ganigani, ina mati enin epen, owa'. Mati Jisas atona naitu nalomam. ⁹ Ea' amam ata' makwaha halaf makini'i etin, Jisas na'ipam mehipe na'i, “Ipe' ina pewalapa amamaga amama dei' patulumu pi'ipa enin epen, owa'. Pefe' dahama

dahama nemaf anama ae' ataga epen endilisiwei, ma sehe ega' etanima ehafel hi'agif wapoti', pi'ipas.”

¹⁰ Ea' amam mahapila basef amama mape, manda'ipama ma'i, “Basef amama Jisasi notanima nohafel hi'agif, ofagema ma'imama?”

¹¹ Ea' mahali'ana Jisas ma'i, “Dei' maina amam mawalipasa mi'uli Godi ma'i Elaija fowa'inai ata'nili' nifi'i?”

¹² Ea' Jisas nagwamama basef na'i, “Endilisi. Elaija nifi'i nondondomba amamaga hiami motaga bo'om andeande'. Ea' basef mail buk Baibeli ma'i dembinai anona nemaf notaga epen endilisinai nope ni'imama? Amama ma'i anan neme' nimanimi awami ma esis sowa' alafugahana. ¹³ Dei' a'ipipa, anona Elaija nafi'i ea'. Ea' esis saila ukup asasimi atom, sanda'mana waf aonai endilisi si'i anom basef mape buk Baibeli ma'iam.”

Jisas nanda' anona sa'unai ambal aonai napeinai ambo'ona

(Mt 17:14-21; Lu 9:37-43)

¹⁴ Jisas naloma alupumi wanom mafi'i mati anom alupumi tu'wanim 9-peleim mapani, ea' mati amam nematawa hiesi saitu felefele'ma amam. Ea' mati anom mawalipasa mi'uli Godi ma'i basef mandahihianamam maloma alupumi Jisasi 9-peleim. ¹⁵ Amam nematawa isima hiesi sati Jisas nafi'i, sohafel gegelalasis kwapete'as, sasagih safe'ma Anan sanifelona. ¹⁶ Ea' Jisas nahali' amam alupumi ananimi na'i, “Ipe' palomam pa'i main pandahihianamam?”

17 Ea' anona aman nape la'afena amam nematawai nagwamana basef Jisas na'i, "Dembina tisa, so'uso'win aman ae'anai anona ambal aonai napein, malogel nase'an. Na'ama efa'an afi'mai ine'. 18 Nimeguf hiami ambal anama aonai nahapilan tatala'in nakwahin newa etap. Ea' apah nataga malogel, nalelef ananiami dindigim dogw, ea' alop ananinai dindigina endilisi. Ae' a'ipa alupumi ine'imi a'i motofa ambal anama aonai nefe', ea' amam ina la'ifim."

19 Ea' Jisas nagwamama basef na'ama na'i, "Ipe' amam nematawa owa' pembale'efa ae'. Nimeguf ma'um ae' ata' epe elomepa? Nimeguf ma'um wapoti' ma efa' nimaniami ipe'imi? Ipe' fa'an pifi'mai ae'."

20 Ea' esis sao'wamana awani inima anan. Ambal anama aonai nati Jisas, mehup nakoto'an kwapete'an nafe' newa etap na'oh, apah afitimi mataga sisih malogel ananinai.

21 Ea' Jisas nahali' ahalomana na'i, "Nogalomena ine'inai, awes anama nanda'an nape nimeguf ma'um?"

Ea' anan na'ipana na'i, "Fowa' ata' awani nape la'ela'ef na'ama etin. 22 Nimeguf hiami ambal aonai nakwahin newala nasef nif fandumi, o newala embel na'i nohan afin. I'i ina la'ifinai, niti ape' owahipipa nigiambama."

23 Ea' Jisas na'ipana na'i, "Dei' maina ine' nahali'i na'ama? Emi epen nembale'efa Ae' endilisi, enin la'ifina nenda' opeh bu'wami mamumami hiami."

24 Ea' ahalomana ma nogalomana anama na'ipa Jisas na'i, "Ae' embale'efa ine' kwauk-wawie'. Dei' nigiambame ma eambale'efena la'ifiwi endilisi."

25 Ea' Jisas nati amam nematawa hiesi safi'i saitu salipana felefele', na'ipa ambal anama aonai mehup na'i, "Ine' ambal aonai nasopama aligahi malogel awani inima, ine' nekwaha so'uso'win inima nefe'. Netanima niefi'mani owa'."

26 Ea' ambal anama aonai nakoto'an mehup nakwahin nandahi' nafe'. Ea' awani inima nandati si'i naga'i ea' hiesi satilin sa'iam na'ama sa'i, "Enin naga' ea'."

27 Ea' Jisas nahapila lagel ananinai nafelan ea' bo'wen naitu. 28 Alupumi Jisasi atom malomana mawis anona ipat mape, mahali'ana na'ama ma'i, "Dei' maina afa' owa' la'ififama weatofa ambal anama aonai?"

29 Ea' Jisas na'ipam na'i, "Ipe' penda' beten pembale'efa God atona, ipe' la'ifipama peatofa ambal anama aonai. Owa' anona eaf petofana. Beten atona."

Jisas na'ipas bifa sohana noga' ma nambimb notanima nehafel wapoti'

(Mt 17:22-23; Lu 9:43-45)

30-31 Ea' Jisas nao'wa alupumi ananimi makwaha anama mapoma mafe' mataga etap hiagoma Galili mawis mafe' anagon mape. Dei' main, Jisas na'i nope nondambaho' nolomama neawalipama basef ananimi. Na'ama nandaiwa'ma anona aman nogawa anama amam mafe' mapoma. Anan nawalipama basef na'ama

na'i, "Ae' ataga epen endilisiwei, nambimb felefele' anona aman nose'asa ae' efe'ma lagof naumbih ae'ami mohe ega'. Ama nimeguf biam hi'ilam meafe'ma wanomi, etanima ehafel efa' ambal namunai wapoti'."

³² Ea' alupumi ananiami mame' basef amama, ea' amam ina mogawa ofagema, owa'. Ea' amam umbamahama meahali'ana ma basef amama ofagema.

Emi epes sope dambesi?
(Mt 18:1-5; Lu 9:46-48)

³³⁻³⁴ Ea' Jisas naloma alupumi ananiami mafe' mataga Kaperneam, mafe' mawis ipat nomon, Jisas nahali'am na'i, "Ipe' pa'i maim basef do'ok wafi'i eaf?"

Do'ok mafi'i eaf, amam ma'i basef hiami ma'i nambimb emi nepe nili' dembinai ma amam. Na'ama amam ina magwamana anom basef, owa'. Tol mape etin.

³⁵ Ea' Jisas nape etap nofala amam mafi'i mape felefele' na'ipam na'i, "Emi epen ni'i netaga dembinai nepe nili', enin ata' nili' netaga si'i nanda' maola anasi, netaga nagi' endilisi ma naep epesi."

³⁶ Ea' Jisas nafilai enin so'uso'win nahaponan naitu la'afena amam nahapilan na'ipam na'i, ³⁷ "Emi egafis sese' opalefa siegiambama enin sa'usa'win si'i ini' ma okom ananinai nopoma Ae', esis sase'e opalef Ae' wapoti' sagiambame. Ea' emi egafis sigiambama ae'i, ina sagiambama Ae' atowe, owa'. Esis sagiambama anan nasapa'e afi'i wapoti'."

Emi egafis owa' naumbih ape'isi, esis alupisi ape'isi

(Lu 9:49-50)

³⁸ Ea' Jon nogwa basef na'ama na'i, “Dembina Tisa, afa' wati anona aman nanda' maol natofa ambagof awami ma agel ine'inai. Ea' anan ina nagalo'ma afa', owa'. Ea' dei' wa'i owa'mana.”

³⁹ Ea' Jisas na'ipa Jon na'i, “Ipe' ina pi'ipana na'ama, owa'. Emi epen nanda' maol bu'unai ma agel Ae'anai, enin ina ni'ipasa basef awami ma Ae', owa'. ⁴⁰ Emi egafis owa' naumbih afa'isi, esis alupisi afa'isi. ⁴¹ Ae' a'ipipa endilisi, emi egafis sitilipa si'i ipe' epes ae'i'pei ma siegiambamepa sese'epa anom amamaga kwauwie'im si'i embel kwaie'um pea'am, anona nemaf God nogwamasam amamaga bu'wami si'i presen.”

Waf aonai nahambombaga epes sombale'efa Godi

(Mt 18:6-9; Lu 17:1-2)

⁴² Ea' Jisas na'ipam na'ama na'i, “I'i emi egafis senda' enin epen so'uso'win nembale'efa ae'i, nefe' nenda' waf aonai, nambimb epes isima sofa' nimanimi awami. I'i enis epes sofa' epes isima sepa' owap lu'unai nil bagafowa asasimi sokwahis sowala naoh loumi, sope andeande' kwaukwawie'. I'i epes isima senda' enin so'wiso'win nekwaha nembale'efa ae', epes isima sepe awes endilisi sikila' isima sewala naoh laumi afis. ⁴³ I'i lagof ipe'imi monda'epa pewa ma waf aonai, petopa'am pekwahom mefe'. Ea' lagel atona etin nope, ma pefa' ambal namunai nopeipa pepan andeande' la'ela'ef. Na'ama lagel

anama nanda' waf aonai nope, nofa'epa pefe' wambel aonai nif fandumi mape la'ela'efi.”

[44 “Wambel anama endihip sa'usa'umi namumi mape la'ela'ef magwa epesi, ea' nif amama wapoti' ina hi'gilalam, owa'.”]

45 “Ea' i'i bo'waga ipe'inai nonda'epa pewa ma waf aonai, petopa'ana pekwahona. Ea' bo'waga atotona nope, ma pefa' ambal namunai nopeipa pepan andeande' la'ela'ef. Na'ama bo'waga anama nonda'epa penda' waf aonai nope nofa'epa pefe' wambel aonai nif fandumi mape la'ela'efi.”

[46 “Wambel anama endihip sa'usa'umi namumi mape la'ela'ef magwa epesi, ea' nif amama wapoti' ina higilalami, owa'.”]

47 “I'i naep ipe'imi monda'epa pewa ma waf aonai, pigiam pekwahom. Atona etin mope ma piwis wambota Godi numafipa, pepe andeande' la'ela'ef. Na'ama naem anama nonda'epa panda' waf aonai nope, nofa'epa pefe' wambel aonai nif fandumi mape la'ela'efi.”

48 “Wambel anama endihip so'uso'umi namumi mape la'ela'ef magwa epesi, ea' nif amama wapoti' ina higilalami, owa'.”

49-50 “Anona nemaf epes hiesi some' nimanimi lu'wami si'i nif monda'as sope bo'wes andeande'. Sol usihimi bu'wami ma gwa'aimi, ea' sol owa' usihim, nambimb penda'am pi'imama usihim wapoti'? Ipe' panda' sola gwa'aimi usihim. Ea' ipe' na'ama etin si'i sol usihimi, pepe opalef ipe'imi etifim peloma sahin owan hiesi pigiambamas penda' waf bu'unai.”

10

Jisas na'ipasa sawala waf anama sandase'amainai

(Mt 19:1-12; Lu 16:18)

¹ Ea' Jisas nakwaha wambel anama nafe' anona etap hiagoma Judia nambo walemb Jordan gani fisana. Ea' amam nematawa hiesi safi'mai Anan wapoti', nase'asa basef si'i la'ela'ef nawalipasam.

² Ea' anom Farisi mafi'i mahali' Jisasa anom basef magwambana ma'i, "Mi'uli ape'inai ande-ande'ma anona aman nondaiwa'ma nemata'w anani'wi nokwaho'w o owa'?"

³ Ea' Jisas nagawamama basef na'ipam na'i, "Moses nase'epa maina mi'uli?"

⁴ Amam magwamana basef ma'ipana ma'i, "Moses na'i a'e ma anona aman ni'i nokwaha akwa'w, nonda' anom basef mil okwatip nose'akwana nokwaho'w kofe'."

⁵ Ea' Jisas na'ipam na'i, "Ipe' patotopa' basefi. Dei' Moses nanda'mepa mi'uli anama. ⁶ Fowa' gani dambadamba God nanda' amamaga hiami, 'Nanda' epes sataga amam nematawa.' ⁷ 'Na'ama esis bias ina ata' sope si'i sape deindei, owa'. Aman nokwaha mamasana ananisi nefe' noloma waulu'mana anani'wi, esis bias sope alop atotona. ⁸ Ea' esis bias sondase'ama sotaga si'i alop etifina.'

Esis ina ata' sape biasa sape deindei, owa'.

⁹ Ea' esis God nakolasis sape la'ifis, isima God na'i enin epen ina nehape'as, owa'."

¹⁰ Ea' Jisas naloma alupumi ananiami mafe' mawis mape ipat, mahali'ana ma waf anama sandase'amainai.

¹¹ Ea' Jisas na'ipam na'i, “Emi egalín nakwaha waulu'mana anani'wi ma nose' ano'w wapoti', anan nanda' waf aonai so'a waola nemata'w akwama nali' nase'akwi. ¹² Ea' na'ama etin, emi egafu'w kokwaha anona kose' anona aman wapoti', akwa'w kwawala waf bu'unai kwatopa' dase'ama kwanda' waf aonai so'a waulanai ma anan nali' nase'akwi.”

*Jisas na'ipasa basef bu'wami ma esis awasi
(Mt 19:13-15; Lu 18:15-17)*

¹³ Ea' esis sau'wamanai enis awasi sofa'as safi'mai Jisas, sa'i anan nowamona lagof anan-imi ma awasi isima ma ni'ipasa basef bu'wami ma God nofalo'mas. Ea' alupumi ananimi mati amama ea' minifalis esis sofa'as sifi'mai Anan. ¹⁴ Ea' Jisas nati amam ma'i manda' na'ama, anan okom aona ma amam ea' na'ipam na'i, “Ipe' kwahowas awasi isima sifi'mai ae'. Ipe' ina pindaiwa'mas. Fa'asi sifi'mai ae'. Esis amam nematawa siowis wambota Godi numafias same' basef ananimi sailam si'i awasi isima. ¹⁵ Ae' a'ipipa endilisi, emi egafis sindaiwa'ma siowis wambota Godi numafias ama sese'ana ukup asasimi ma God si'i awasi isima sa'i aho'mana, epes isima sanda'am na'ama ina nambimb suwis wambota Godi numafias, owa'.”

¹⁶ Ea' Anan nafela awasi isima nahapilas satoma bo'wagah ananimi nawamona lagof ananimi balagah asasimi na'ipasa basef bu'wami ma God nofalo'mas.

*Aman anama awomunai amamaga hiamunai
(Mt 19:16-30; Lu 18:18-30)*

17 Jisas nohafel nafe', anona aman nasagih nafi'mai anan nindiwa nembawa notawa nahali'ana na'i, "Tisa bu'winai, ae' nambimb enda' maina waf bu'unai ma efa' ambal namunai epe andeande' la'ela'ef?"

18 Ea' Jisas na'ipana na'i, "Dei' maina ine' na'i Ae' bu'uwei? God atona Anan bu'unai. 19 Ine' negawa mi'uli God nasol Mosesanai na'i, 'Ina nenda' waf aonai so'a waulanai neha enis sogal nenda' wal, owa', ine' owa' nembaso'ma enis epes ama nenda' kotimas etin, ea' ina nembaso'ma enis epes ma nefa' anom amamaga asasimi, owa'. Ine' nepe owina mamasena ine'isi neme' basef asasimi nilam ea' numafias andeande'.' "

20 Ea' aman anama na'ipa Jisas na'i, "Tisa, mi'uli anama hianai ahapilana ailana fowal atal awani afi'i afi'i ataga dei'."

21 Ea' okom Jisasi nohafela anan nainailana, na'ipana na'i, "Ine' anona waf bu'unai atotona atal owa' neanda'anai. Ine' fo'lo nese'asa amamaga ine'imi hiami enis epes sotaluma nefa' moni anama nenda'ana neso' isima kwahusi. Nenda'am na'ama ma anona nemaf nefa' amamaga bu'wami gani heven ilif. Ea' nembale'efa ae' nila ae'."

22 Ea' aman anama neme' basef amama nandaiwa'ma nonda'am nose' enis epes kwahusi. Ea' okom ananinai nimanina endilisi nandamboma megah atogah nafe'. Dei' main? Anan amamaga hiamunai. 23 Ea' Jisas natologon ganigani na'ipa alupumi ananinai na'i, "Epes isima wiga moni hiamisi sanda'am ahifim endilisi ma sefe' suwis wambota Godi numafias. Atona etin sefe' siowis."

24 Ea' amam mohafel gegelalasoma basef amama na'ipamami. Ea' Jisas nagwamama basef wapoti' na'i, "Owape ae'ipei, eaf nafe' anamai ina andipana, owa'. Ahifina. 25 Anona mafin lu'unai kamel nuwis nil nagala sagundisa luwag-ufanai, anama wila ma niowis. Ea' amam nematawa amamaga hiamisi sefe' siowis wambota Godi numafias sonda'am ahifim endilisi ma sefe' siowis. Eaf anama ahifina endilisi nikila' maol kamel nuwis nil nagala."

26 Ea' alupumi ananimi mohafel gegelalansom kwapete'am endilisi manda'ipama ma'i, "I'i na'ama, anona nemaf God nofa' emi egafis setanimani? Owa'etin."

27 Ea' Jisas nati amam na'ipam na'i, "Amamaga epes owa' la'ifisa seanda'ami, amama God atona la'ifinai ma nonda'am. Anan la'ifinai ma nonda' amamaga hiami."

28 Ea' Pita na'ipana na'i, "Neme', afa' wakwaha amamaga afa'imi hiami, dei' wafi'i wambale'efa basef ine'imi wailina."

29-30 Ea' Jisas na'ipana na'i, "Endilisi, ae' a'ipipa na'ama a'i, Ipe' emi egafipa ukup ipe'imi mopoma Ae' eloma basef bu'wami Godi pekwaha ifagw moloma sahin owan ahapas mamasas batawisas moloma aof amamaga maim ipe'imi, anona nemaf pefa' amamaga amama hiami endilisi, mikila' ipe'imi amamaga fowa'imi. Ea' enis epes nambimb sehapa sonda'mepa waf aonai. Ea' anona nemaf nogota bu'unai neataga, pefa' ambagof namumi pepan andeande' la'ela'ef hihif. 31 Ea' epes hiesi dei' sataga sali'i agof lu'wamisi, anona nemaf agof a'as sotaga

sigi'. Ea' epes isima sataga sagi'i anona nemaf owagama sofa' agof lu'wami sotaga sili'."

Jisas na'iam wenifa noga' ma notanima nohafel wapoti'

(Mt 20:17-19; Lu 18:31-34)

³² Esis saila eaf safe' sondowasa' Jerusalem, Jisas nafe' nali'as. Ea' alupumi ananiami mailana mafe'. Amam mogawa Anan nafe' Jerusalem, na'ama dei' amam gegelalasom. Enis epes sagi'ima amam, esis umbamahas. Ea' Jisas nao'wa alupumi atom mafe' mape anagon dei, na'ipama amamaga amama nambimb meatagamasi. ³³ Ea' na'ipam na'i, "Peme'. Dei' afa' ondowasa' Jerusalem. Ae' ataga epen endilisiwei, nambimb anona aman nowalapa ae' ma efe'ma amam pris dambami moloma amam mawalipasa mi'uli Godi ea' monda' kotimi ea' mi'i basef mondame'mam mohe ega'. Ea' monda'e efe'ma esis sololama Godi ma ³⁴ sonda' salamala ae' sonda' findiwae sisisi'wafe sopagahowe sehe ega'. Ama nimeguf biam hi'alam, anona nefe'ma wanomi etanima ehafel wapoti'."

Jems naloma Jon ma'i mope dambami

(Mt 20:20-28)

³⁵ Ea' Jems naloma Jon, Sebedi batawisana mafi'i mahali' Jisas ma'i, "Dembina' tisa, afa' biafa wa'i uhali'ina ma anom basef ea' nenda'mafam afa' biafa."

³⁶ Ea' Jisas nahali'am na'i, "Ipe' pa'i enda'mepa main?"

³⁷ Ea' ma'ipana ma'i, "Anona nemaf ine' netaga nefa' agel lu'unai mafifili gani wambel Godi, nemaf anama afa' wa'i ine' nenda'afa ope dembifai

wil olomena wa'owa'ol, anona nil wa'ol egagili ea' anona nil wa'ol da'isinaima.”

³⁸ Ea' Jisas na'ipam na'i, “Ipe' bipa ina pegawa andeande'ma amamaga amama pahali'imami, owa! Ipe' bipa la'ifipama pea' embela kap anama dei' ae' eagwa' embelanai, o owa'?”

Ea' Jisas na'ipam na'ama ea' na'ipam wapoti' na'i, “Ipe' bipa la'ifipama pefa' baptais amama dei' efa'ami o owa'?”

³⁹ Ea' magwamana basef ma'ipana ma'i, “Afa' wila la'ififa.”

Ea' Jisas na'ipam na'i, “Endilisi, kap anama dei' ae' ea' embelanai, ea' baptais amama nambimb efa'ami amama ipe' nambimb pefa'am. ⁴⁰ Ea' peape lagel da'isinai o eganai ae'ami, amama ina maol ae'anai, owa'. God atona ni'i esis isima nandandepas ea'i, esis etis sope lagof da'isinai egagili ae'ami.”

⁴¹ Ea' alupumi tu'wanim 10-peleim mame' amam biam ma'iam na'ama, manda' megah maham Jems naloma Jon. ⁴² Ea' Jisas no-fala alupumi Ananimi 12-peleim mafi'mai Anan, na'ipam na'i, “Ipe' pegawa epes sololama Godi sa'i agufumi asasimi dambami, amam mape ilifa esis manda'as kwapete'as. Ea' amam dambami mape la'ifim endilisi manda' esis amam nematawa saila malogof amamumi. ⁴³ Ea' waf anamai ina nepoma ipe', hapainai. Emi aman nope dembinai ma ipe'i, anan ata' nili' nope si'i nanda' maola ipe' hipai. ⁴⁴⁻⁴⁵ Emi aman ni'i nope nili', anan nepe owina ipe' hipai nonda'mepa opeh ipe'imi. Ae' ataga epen endilisiwei ina afi'ima esis sonda'me opeh sigiambame, owa'.

Ae' afi'i ma sehe ega' etala ipe' peloma epes hiesi etagahipama waf aonai nowa'ipei. Ea' emi egelin ni'i notaga dembeni ma ipe', anan ata' nopan si'i agel a'anai nonda'masa maol hiesi.”

Anona aman naep mase'anai Jisas nanda'ana bo'ona

(Mt 20:29-34; Lu 18:35-43)

⁴⁶ Ea' Jisas nao'wa alupumi ananiami mafe' mataga Jeriko. Ea' ma'i mokwaha Jeriko mefe' moloma amam nematawa hiesi, mataga eaf nawis wambel, ea' anona aman naep mase'anai Bartimeus, nogalomona Timeusi, tol nape fele-fele'ma eaf. Anan nape nandailasa gwa'aيمي moni maim. ⁴⁷ Bartimeus name' basefa Jisas Nasaretinai nafi'i nape, ea' nofalana mehipe na'i, “Jisas, ine' akunamana Deviti, niti ae' uwahipiwi!”

⁴⁸ Ea' esis hiesi sinifalona sa'i, “Ine' feso'mena.”

Ea' anan fala etin nape na'i, “Jisas ine' akunamana Deviti, nitolowe uwahipiwi.”

⁴⁹ Ea' Jisas nafi'i naitu na'i, “Kipana nifi'mai ae'.”

Ea' sa'ipana sa'i, “Nomonas la'ifim. Hafel! Fi'i Jisas nofalina.”

⁵⁰ Ea' anan nakwaha saket ananinai nohafel mehipe nafe'ma Jisas.

⁵¹ Ea' Jisas na'ipana na'i, “Ine' na'i ae' enda'mena main?”

Ea' na'ipana na'i, “Dembinai tisa, ae' a'i iti andeande' wapoti'.”

52 *Ea' Jisas na'ipana na'i, "Ine' fo'lo. Ine' nembale'efa ae' la'ifiwei ma anda'ena bo'wena wapoti'."

Ea' mehip naep matiana andeande' nagima Jisas nafe' eaf.

11

Jisas nondowasa' nafe' nawis Jerusalem si'i anona dembinai king

(Mt 21:1-11; Lu 19:28-40; Jo 12:12-19)

¹ Jisas naloma alupumi ananimi mafe' mondowasa' mataga felefele'ma Jerusalem, ea' mataga Betani naloma Betafage wambel bie fina ea' mataga halaf lawah oliv motawama. Ea' Jisas nasapa' alupumi ananimi biam ² na'ipam na'i, "Ipe' bipa pefe' wambel nanima nape gani wa'ol felefele'ma na'ae pefe' piwis wambel anama, piti anona donki so'unai sapananail. Ina dei' enin epen natomana, ata' owa'. Petagahona pefa'ana pifi'mai ae'. ³ I'i enin epen nihali'ipa ni'i, 'Ipe' pafi'i panda'am na'ama ma main?' Ea' ipe' pi'ipana pi'i, 'Dembinai afa'inai na'ipafa na'i nonda' maolana atuwasi nosapa'ana notanimamipei mehip.' "

⁴⁻⁵ Ea' amam biam mafe' mati anona donki sa'unai sapete'ana nail ipat uta ande' felefele'ma eaf. Amam ata' matagahona etin, enis saitufelefele' sahali'am sa'i, "Dei' maina ipe' patagaha donki anama?"

⁶ Ea' ma'ipas si'i Jisas do'ok na'ipam. Ea' sa'i a'e ma amam mofa' donki anama. ⁷ Ea' mofa'ana

* **10:52:** Mk 5:34; Mk 11:9; Sam 118:25-26

mafi'mai Jisas, mawamona sagwegw amamumi matoma donki anama Jisas natomam. ⁸ Ea' esis hiesi sambe'amonam sagwegw eaf.* Enis satopa'i lawah motawa aof felefele'i sase'wiam eaf sofalo'mana. ⁹ Esis hiesi sali' sagi' sanda' la kolo' safe' na'ama sa'i,

“Hosana. Ape' mandanifel endilisi ma ine'. Ape' ma'i God nofalo'ma ine' nafi'i agel Dembinai.

¹⁰ Dei' awi ine' nafi'i, nape Dembinai ma ape' nimafiapa si'i fowa' gani Devit nape dembinai numafias. Hosana. Ape' mosa'ma agel Godi nolata ilif endilisi.”

¹¹ Ea' Jisas nawis Jerusalem nafe' nawis ipat Godi lu'unai sanda' lotuwanai. Nawis nati amamaga nafe'ma hi'alam, aon na'i nowala, nao'wa alupumi 12-peleim ananiami mafe' Betani.

Jisas na'ipa anona lawag agilinama fik ma ina ata' nil nola su'utip wapoti', owa'

(Mt 21:18-19)

¹² Wafilu Jisas naloma alupumi ananiami mohafel makwaha Betani mafi'i etin, Jisas nolomahana. ¹³ Ea' naitu nati anona lawag agilinama fik notawa laogon felefele', nati apul atom. Ea' nafe' felefele' nagolopa su'utip. Ea' ina nati anom mailana, owa'. Nati apul atom. Nogota anama mailanai ata' owa'. ¹⁴ Ea' Jisas na'ipana na'i, “Ina ata' nela anom su'utip milina wapoti', owa'”.

Ea' alupumi ananiami mame' basef amama na'ipa lawagami.

* **11:8:** Esis sambe'amonam sagwegw eafa sesa'ma agel Jisasi lu'una.

Jisas nagolo'ma amam nematawa satala amamaga ipat lu'unai Godi sawisi ande'

(Mt 21:12-17; Lu 19:45-48; Jo 2:13-22)

¹⁵ Jisas naloma alupumi ananimiti mafe' mataga Jerusalem, ea' nawis ipat lu'unai Godi nagolo'ma esis hiesi sanda' bisnisi saloma isima satalom ipat anama nomoni sawisi ande'. Anom amam mati otamba enis epesi mindisila'mam. Ea' Jisas namboma tebol amamumi nakowasom. Enis sanda' bisnisa setal amiguf mai'unamb. Ea' namboma siaifah اساسيمي nakowasom wapoti'.

¹⁶ Ea' nanda'imagon na'i, "Ina ata' sofa' anom amamaga amama suwisi nomon wapoti' ipat anama sandatama sapoma, owa'." ¹⁷ Ea' na'ipasa basef Godi mail Baibeli na'i,

"Ipat Ae'anai nopoma esis sape ganimi wambel hiagomai ma sifi'i sopaina sonda' beten sohalit Ae'. Ea' ipe' panda'ana nataga sili sanda' walanai."

¹⁸ Amam nematawa hiesi gegelalasisa basef ananimiti. Amama atom pris amama dambami maloma amam mawalipasa mi'uli Godi umbamahama anan. Ea' magolopa eafa mohana neaga'.

¹⁹ Ea' wambomota Jisas nao'wa alupumi ananimiti makwaha Jerusalem mafe'.

Emi nombale'efa God nenda' beten nihali'ana, nambimb nefa' amamaga

(Mt 21:20-22)

²⁰ Wafilu kuhimbita atona Jisas naloma alupumi ananimiti mafe' mati lawag anama fik bowana alina, soh maloma nombalef alim hi'alam. ²¹ Ea' Pita natolona okom napoma Jisas na'iami basefa lawag anama ea' na'ipana na'i,

“Dembinai tisa, ine' niti lawag anae' nambati' ine' na'ipanai, alina hi'alana.”

²² Ea' Jisas nagwamama basef amam na'ipam na'i, “Ipe' pembale'efa God. ²³ Endilisi ae' a'ipipa, emi egafis owa' ukup bimbiefim mopeis ma esis ukup etifim sembale'a basef Ae'ami endilisi si'ipa halaf nani si'i, 'Ine' degia nefe' newala naoh,' endilisi God nambimb nonda'am motaga si'i esis ukup ma'iam. ²⁴ Na'ama a'ipipa, I'i ipe' pi'i penda' betena pehali Goda anom amamaga, pembale'efa God endilisi penda' beten pi'i, 'Endilisi, afa' nambimb ofa'ami,' ma nambimb pefa'am si'i pa'iam. ²⁵ Nema'anama ipe' pitu penda' beten, pekwahomasa waf aonai enis sanda'mepanai. Ama Ahalomepa nape heven ilifi nekwahomepa waf aonai ipe' panda'anai wapoti'. [²⁶ I'i pindaiwa'ma peakwahomasa waf aonai enis epes sanda'mepanai, Ahalomepa nape heveni ina nekwahomepa waf aonai ipe' panda'anai, owa'etin.]”

Amam mahali' Jisas ma'i, “Emi na'ipina ma nepe dembinai?”

(Mt 21:23-27; Lu 20:1-8)

²⁷ Ea' Jisas naloma alupumi ananiami mafi'i Jerusalem wapoti', ea' nafe' nawis ipat lu'unai Godi sanda' lotuwanai. Anan ata' nafe' etin, amam pris dambami maloma anom mawalipasa mi'uli Godi maloma amam agufumi Juda mafi'mai Anan. ²⁸ Ea' mahali'ana ma'i, “Ine' nefa' agel maina dei' nanda' maol anama? Emi na'ipina ma nepe dembinai nanda' maol anama?”

29 Ea' Jisas nagwamama basef na'i, "Ae' wapoti', a'i ihali'ipa ma anom basefa ipe' ata' pili' pi'ipa ae', ma atuwasi i'ipipa emi na'ipi ape dembiwei anda' maol anama. 30 Jon napisi'as amam nematawa hiesi, emi na'ipana nanda' maol anama? God nape heveni na'ipana napisi'as o enin epen etapanai na'ipana? Ipe' pegwam pi'ipiam."

31 Ea' mame' basef amama manda'ipama ma'i, "Afa' wi'i, 'God nape heveni na'ipana,' Anan atuwasi ni'ipafa ni'i, 'Dei' maina ipe' owa' pembale'efana?' 32 Ea' afa' wi'i, 'Epes sape etapi sa'ipa Jon napisi'asi,' na'ama esis amam nematawa sohafa."

Dei' main, esis hiesi sa'i Jon anan profet dembinai. Ea' amam umbamahama esis. 33 Ea' magwamana basef ma'i, "Afa' ina ogawana."

Ea' Jisas na'ipam na'i, "Na'ama etin ae' ina i'ipipa emi nase'e agel lu'unai na'ipi anda' maol anama."

12

Basef womun etina amam awami mumafi aofi (Mt 21:33-46; Lu 20:9-19)

1 Ea' Jisas nanda' anom basef womun etina esis na'i, "Anona aman dembinai nanda' anona aof nawa wain nahopana. Aof anama nomon anan nanda' anona tang notawa ma sofa'asa su'utip amama wainim, ea' nala' anona ipat launai notawa sope sumafiagon. Ea' nakwahomama aof anama anom amam ma'i monda' maolanana. Ea' anan nafe' napani anona wambel laugoma.

2 Ama nogota su'utip mailanai, nafamona aof

anamai nasapa' anona nanda' maoli nafe' ma
 amam manda' maol aof ananinai. Na'i amam
 mose'ana anom su'utip gwa'aimi ma aof anama.
³ Ea' mombalo'ana mahana matofana notanima
 nafe'. ⁴ Ea' nafamona aofi nasapa' anona nanda'
 maoli nafe' wapoti' ma mose'ana anom su'utip.
 Ea' mombalo'ana wapoti' mahana mawala bala-
 gana manda'ana kwapete'ana. ⁵ Ea' nafamona
 aofi nasapa' anona nanda' maoli nafe' wapoti',
 ea' mahana afuna, ea' nafamona aofi nasapa'
 anom hiami mafe'. Ea' maham etin anom
 afum. ⁶ *Ea' nagi' nasapa' aman atotona napani
 wapoti'. Anama nogalomana ananinai. Okom
 ananinai nohafel nainailana endilisi. Ea' na'iam
 na'i, 'Nambimb, amam mome' malogel nogalome
 ae'anai.' ⁷ Ea' amam mati nogalomana ananinai
 nafi'i, manda'ipama etin ma'i, 'Aman anama
 anona nemaf nofa' amamaga hiami ahalomanai.
 Afa' ohana afuna, ma afa' atofa ofa' aof anama.'
⁸ *Ea' mombalo'ana mahana afuna makwaha
 alop ananinai nawis na'oh aof ande'. ⁹ Ea' nam-
 bimb anan nafamona aofi nonda' maina amam?
 Nambimb nifi'i noham afum hi'ilam, nose'asa aof
 anama nefe'ma enis. ¹⁰ *Ipe' patalifa basef Godi
 pegawam ea'. Basef Baibeli ma'i na'ama ma'i,
 'Owap* anama mala' ifagwi magwasi'ana dei'
 nataga nape owap nape nali'i nembalo'
 ipat.

¹¹ Dembinai nanda' amama mataga, ape' ma-
 tolom bo'om endilisi.' ”

* **12:6:** Mt 3:17 * **12:8:** Hi 13:12 * **12:10:** Sam 118:22,23

* **12:10:** Basef amama ma owap ma'i Jisas.

¹² Ea' amam agufumi esis Judai mogawa anan na'i basef amama womun etini mondola'wifa amam. Ea' ma'i mombalo'ana. Ea' amam umbamahama esis amam nematawa hiesi. Ea' makwahona mafe'.

Amam mahali' Jisasa esis sose'ana takis Sisar dembinai gavman nali'ma esis Romi
(Mt 22:15-22; Lu 20:20-26)

¹³ *Ea' amam agufumi Judai masapa'am anom Farisi maloma anom amam Heroti mafe'ma Jisas ma'i mome' anom basef ananiami owa' ande-ande'i ma monda'mana basef mowa'ana si'i sowa' bogof. ¹⁴ Ea' amam mafi'i makikipana ma'i, “Dembina'i Tisa, afa' ogawena ine' aman na'i basef endilisimi. Ina ni'ipasa anom basef isima enis agof lu'wamisi ea' anom basef isima agof a'asi falafisi, owa'. Ine' na'ipasa basef atifim endilisimi atom ma okom Godi amam nematawa hiesi dondo' etin hi'alam. ¹⁵ Mi'uli ape'inai na'i andeande'ma ape' mose'ana takis Sisar gavman dembinai ma esis Rom, o owa'?”

Ea' Jisas negawam baso'am amamunai na'ipam na'i, “Dei' maina ipe' pagwamba ae'? Fa'mai anona moni atotona ata' itolona.”

¹⁶ Ea' mofa'mananai ma natolona nahali'am na'i, “Ambal naloma agel anama mailanai emina'i?”

Ea' ma'i, “Amama Sisari gavman dembinai.”

¹⁷ Ea' nagwamama basef na'ipam na'i, “Ea' amamaga Sisari pese'anam Sisar. Ea' amamaga Godi, pese'anam God.”

Ea' amam gegelalasom ukup matamea ma Anan.

* 12:13: Mk 3:6

*Amam mahali' Jisasa saga'i sohafel wapoti'
(Mt 22:23-33; Lu 20:27-40)*

¹⁸ Anom amam Sadyusi amam hiami ma'i saga'i ina anona nemaf sotanima sohafel wapoti', owa'. Ea' mafi'mai Jisas mahali'ana ma'i, ¹⁹ “Dembinai Tisa, fowa' gani Moses nanda' anom basef mail buki ma ape' ma'i, 'I'i anona aman noga' ma anan awasi a'ana, ea' waulu'mana ata' kope, owalomana ananinai nose'akw nola enis awasi ma soho'ofana.’ ²⁰ Ea' fowa' amam wambota atotona 7-peleim mape. Nali'i sahalomam nase'akw awani a'akw naga' nakwaho'w kwape. ²¹⁻²² Ea' owalomana nagi' nase'akw, naga' nakwaho'w kwape awani a'akw. Ea' owapam mandatu'umai manda'am na'ama etin, mase'akw maga' etin hi'alam mafe' mafe'ma matagama owagufunai akutainai. Amam amama wambutaim ina mola enis awasi, owa'. Maga' etin hi'alam. Ea' waulu'mam kwagi' kwaga' kwagi'mam. ²³ Ea' nemaf anama esis saga'i sohafel wapoti', nemata'w akwama kope nemata'w emi'wi? Amam 7-peleim maso'akw etin hi'alam kwape waulu'mam amamu'wi.”

²⁴ Ea' Jisas nagwamama basef na'i, “Ipe' owa' pegawa basef Baibel na'iami, owa' pegawa pepel Godi. ²⁵ Nemaf anama saga'i sokwaha hi'agilif sohafel wapoti', amam nematawa ina ata' sondase'ama wapoti', owa'. Sopan etin si'i ensel mape heveni. ²⁶ Basef amama saga'i sotanima sohafel wapoti', ipe' patalifa basef mail buk Baibeli, fowa' gani God na'ipa Mosesami. Basef amama ma'i nif ilalowa mataga ma lawag so'unai fandonai. Basef amama God na'ipa Moses na'i,

‘Ae' God Abrahami, Aisaki, maloma Jekopi.’

²⁷ Basef amama ma'i Dembinai, Anan ina God epes saga'i, owa'. Anan God epes isima ambal napeis sape namusi. Ea' basef ipe'imi ina endilisimi. Ipe' ina pegawam andeande', owa'.”

Mi'uli Godi nali'i nikila' mi'uli hianai ape' membale'efanai

(Mt 22:34-40)

²⁸ Anona aman nawalipasa mi'uli Godi nafi'i, name' amam ma'i maloma Jisas mandahihi-anama basef. Ea' name' Jisas nagwamama basef bu'wami atom.

Ea' nahali'ana na'i, “Mi'uli Godi ape' membale'efanai hianai. Ea' maina mi'uli lu'unai nikila' mi'uli hianai nape nali'i?” ²⁹ Ea' Jisas nagwamana basef na'i, “Mi'uli nali'i anama.

‘Ipe' Israel, ipe' peme! Dembinai God ape'inai, Anan atona Dembinai.

³⁰ Nomonas ipe'imi mohafela Dembinai God ipe'inai mimilana na'ama. Ukup ipe'imi mimilana hi'ilam, pese'ana ambagof opalef moloma pepel ipe'imi pese'anam hi'ilama Dembinai God atona.’

³¹ Ea' mi'uli nafe'ma bifi anama.

‘Ipe' ukup mimila enis epes sape felefele'ma ipe'i si'i ukup maimaila ipe' etipa.’

Owa' anona mi'uli nikila' mi'uli anama biefina, owa'. Mi'uli anama biefina ape' membale'efanai ea' anama atona.” ³² Ea' aman anama na'ipa Jisas na'i, “Dembinai, ine' na'iam andeande'. God atona Anan Dembinai, Anan atona nape. Owa' anona aman nope dembinai si'i Anan. ³³ Mi'uli lu'unai nali'i anama. Nomonas ipe'imi mohafela

anan mimilana na'ama. Ukup ipe'imi mimilana hi'ilam, pese'ana opalef moloma gawa moloma pepel ipe'inai hi'ilana. Na'ama andeande'. Ea' mi'uli nag'i anama. Ipe' piti uwahipis ukup mimila emi egafis sape felefele'ma ipe'i si'i ipe' ukup maila ipe' etipa. Na'ama andeande'. I'i ape' mila mi'uli anama biefina, waf anama bu'unai nikila' gwa'aimi mafis maim mose'anam Godi ata' bo'om andeande'."

³⁴ Jisas name' aman anama nagwa basef si'i aman gawa bu'unai. Ea' na'ipana na'i, "Ina ata' nogota laona ma niowis wambota Godi numafina, owa'."

Ea' amam hiami umbamahama meahali' Jisasa anom basef wapoti'.

Jisas nahali' esisa Kraiss, God nandandepana nasapa'ana nafi'i

(Mt 22:41-46; Lu 20:41-44)

³⁵ Ea' Jisas nape felefele' ma ipat lu'unai Godi sanda' lotuwanai nase'asa basef esis amam nematawa na'i, "Amam mawalipasa mi'uli Godi ma'i, 'Krais, aman anama God nandandepana nasapa'ana niefi'i, Devit akunamana.' Ea' ma'i Kraiss aman atona etapanai. Dei' maina ma'iam na'ama ma Kraiss? ³⁶ Ambal Bu'unai Godi fowa' gani nafela Devit na'i

'Dembina' God na'ipa Dembinai ae'anai na'i, "Ine' nepe lagel da'isinai ae'anai la'ela'ef nefe' netagama anona nemaf ae' enda' naumbih ine'isi sefe' owina bo'wagah ine'imi." "

³⁷ King Devit fowa' gani nofala Kraiss na'i,

‘Anan Dembinai.’ Amama atom dei' Krais ina aman nogalomana Deviti atona falafunai, owa'. Anan Dembinai.”

Ea' amam nematawa hiesi sandanifel same' basef Ananimi.

Amam mawalipasa mi'uli Godi waf amamunai aona

(Mt 23:1-36; Lu 11:37-54; 20:45-47)

³⁸ Ea' Jisas nawalipasa basef na'i, “Ipe' pin-dumafuma andeande' ma amam mawalipasa mi'uli Godi. Amam ma'i mowaho'a luwaguf laumi atom mofe'ma esis sotoloma si'i amam dambami manda' waf bu'unai. Amam ma'i mope anama esis hiesi sandatama sapoma ma sotoloma sefela agof amamumi sinifelom. ³⁹ Amam amama ukup ma'i mope siaifah amama motawa mali'i atom, dambami atom mapoma nomon ifagw esis Juda sa'i basef sapeimi o anama epes hiesi sandatama sapoma nimeguf amama sanda' gwa'aيمي lu'wami ma hiesi sotolom. ⁴⁰ Ea' amam mawis ifagw amama nematawa alifiwai, mawis makowalopam amamaga awaumi. Ea' mohafel maitu manda' beten launai atona wafinai esis sotolom si'i amam bu'wami. Anona nemaf God nowaloga epes hiesi. Enis epes owa' senda' waf aonai na'amainai anona nemaf sofa' nimanimi kwawie'um, ea' amam mofa' nimanimi lu'wami endilisi.”

Nemata'w alifi'wi kwase'ana moni sa'unai bie-fina God kwanda' ofa

(Lu 21:1-4)

⁴¹ Jisas nape nomon ipat lu'unai Godi sanda' lotuwanai, nape felefele'ma bokis amama sala moni nalami. Anan nape nati amam nematawa

safi'i sala moni nowala bokis amama. Amam nematawa isima hiesi moni hianaisi sala moni hianai. ⁴² Ea' ano'w nemata'w alifi'wi kwafi'i kwala moni sa'unai biefina si'i 10 toea newala bokis isima. ⁴³ Ea' nofala alupumi ananimiti mafi'i na'ipam na'i, "Ae' a'ipipa endilisi, nemata'w akwama alifi'wi kwala moni lu'unai nikila' moni hianai amam nematawa hiesi salanai. ⁴⁴ Epes isima hiesi moni hianai na'omas, sala tu'wanina atona nowala bokis. Ea' nemata'w akwama, moni a'akw endilisi, akwa'w kwala moni ako'unai hi'alana. Ea' owa' anona ne'oh kweatala gwa'aimi, owa'. Ea' moni akwa'unai biefina so'unai nikila' moni hianai esis salanai."

13

Jisas na'i ipat lu'unai Godi anona nemaf enis sufi'i sutalona

(Mt 24:1-2; Lu 21:5-6)

¹ Jisas nape nomon ipat anama lu'unai Godi sanda' lotuwanai. Ea' na'i nokwaha ipat anama nawisi ande', anona alupunai ananinai nafi'i na'ipana na'i, "Tisa, ine' niti ifagw amama bu'wami. Sanda' otamba lu'wami sanda'am bu'wami atom." ² Ea' Jisas nagwamana basef na'i na'ama, na'i, "Ine' nati ifagw amama lu'wami? Anona nemaf ina anom otamba mondatoma la'ifim etin mope, owa'. Sowowalom atona etin hi'ilam mo'oh."

Jisas na'i nimanimiti lu'wami motaga

(Mt 24:3-14; Lu 21:7-19)

³ Jisas nape halaf anama lawah oliv motawama ea' nati ipat lu'unai Godi notawa to'wan wa'ol. Ea' Pita naloma Jems naloma Jon naloma Andru

atom mafi'mai Anan mahali'ana ma'i, ⁴ “Ine' ni'ipafa amamaga amama nambai' motaga'? Maina ikwaf nili' notaga ma afa'ogawa amamaga amama felefele'ma motaga si'i dei' na'ipafa?”

⁵ Ea' Jisas na'ipama basef na'ama na'i, “Ipe' pindumafuma andeande'. Na'ama enin epen nembaso'mepa. ⁶ Dei' main, amam hiami anona nemaf mifi'i mombaso'mepa mi'i agel ae'anai mi'i, 'Ae' ma'uwi ae' Kraiss, God nandandepe nasapa'e afi'i.' Ea' anona nemaf amam mombaso'ma amam nematawa hiesi some' basef amamumi si'i endilisimi silam. ⁷ Anona nemaf peme'asa basefa wandaf lu'unai hianai notaga ea' ipe' ina umbamehepa, owa'. Amamaga amama anona nemaf motaga ea' nemaf akutainai ata' owa'. ⁸ Enis epes sape anama etap hiagoma kantri sofela wandaf sopa' soloma anona kantri. Anona king nohafel no'wa enis wambel hiagoma ananisi sopa' soloma anona king no'wa ananisi wambel hiagoma. Enis epes wambel hiagoma atona etin etap bol etin nope, ea' enis epes hiesi sape wambel hiagoma nolomohas sope. Amamaga amama hiami ata' muli' motaga si'i nimanimi mali'i ma nemata'w kwa'i kola awani. Ea' nimanimi anona nemaf migi' meatagai lu'um endilisi mikila' amama mali'i. ⁹ Ipe' pindumafuma andeande'. Anona nemaf sonda' kotimipa ma gavman dambami asasimi. Ea' sehapa nomon ifagw esis Juda sa'i basef sapeimi. Ipe' pame' basef ae'ami paila ae'i amama atom dei' sondaiwa'mepa sonda'epa pitu naep kingi moloma gavman dambami ma peawalapa basef ae'ami bu'wami pi'ipasam. ¹⁰ Alupisi ae'asi ata' sili' sofe' wambel

hiagoma si'ipa amam nematawa hiesi some' basef bu'wami Godi mili'. ¹¹ Nema'f anama esis sowalapepa sofa'epa pefe'ma kot, ipe' ina umbamehepa pi'i, 'Atuwasi afa' wi'i maim basef?' Owa'. Maim basef God niesi'ipami ma nogota anama atona, amama ipe' pewalapam. Amama ina basef ipe'imi atom, owa'. Ambal Bu'unai Godi atona nowalapama ipe' pi'iam. ¹² Anona nema'f esis hiesi sahin owan sondanda'ma kot, sohas sogal. Ea' ahapas sonda'am na'ama etina esis nogamas asasisi. Ea' batawisas wapoti' sonda' kotima mamasas asasisi enis sohas sogal. ¹³ Anona nema'f epes hiesi wambel hiagoma opalef aoma ipe' endilisi. Esis sati ipe' paila basef ae'ami na'ama dei' sahepa. Ea' emi egafis sem-bale'efa Ae' situ la'ifis sotaga nema'f akutainai, isima anona nema'f God nefa'as sotanemani.

*Amamaga awami endilisi anona nema'f motaga
(Mt 24:15-28; Lu 21:20-24)*

¹⁴ Anona nema'f ipe' piti amamaga mohambombaga amamaga bu'wami motaga mope nomon ipat lu'unai Godi. God nandaiwa' endilisi ma amamaga awami mope nomon ipat Ananinai." (Emi egafis setalifa basef amama, esis sogawa basef ofagema andeande'.)

"Nema'f anama amam nematawa sape etap hiagoma Judia sofa' sefe' sondowasa' halafutagw. ¹⁵ Ea' emi egafis sape ipat ande' felefele' ina ata' setanima suwis sefa'ai amamaga asasimi ipat nomon, owa'. Esis sofa' sefe' mehip. ¹⁶ Emi egafis sapani aofi, ina ata' setanima sefe' wambel sefa' luwaguf maim asasimi, owa. Esis sofa' sefe'

mehip. ¹⁷ Nematawa opafuwai waloma awama awasi ata' sagwa' nomambeh atomi Ae' a'i awau uwahipiwa endilisi ma nogota anama ofa' nimanimi lu'wami endilisi. ¹⁸ Ipe' penda' betena amamaga amama nimanimi ina motagamepa nogota anama uf noloma asaf mifi'i. ¹⁹ Nogota anama nimanimi lu'wami endilisi meataganai. Fowa' dambadamba God nanda' etap nataga nafi'i nafi'i nataga dei', nimanimi amama lu'wami ina anom na'amaimi mataga, owa'. Ea' anona nemaf wapoti' ina anom nimanimi amama motaga, owa'. ²⁰ I'i God owa' nenda' nimeguf mefe' bandam, anona nemaf amam nematawa hiesi hegililas hi'ilas. Owa'etin. God okom napoma epes isima anan nasahe'as ea dei' nanda' nogota anama bandana. ²¹ Nemaf anama notaga ma i'i enis epes si'ipipa si'i, 'Ipe' piti Kraisi, God nandandepana nasap'ana nafi'i, anan nape na'ae,' o 'Nani nape gani,' ipe' ina pembale'efas, owa' hapaisi. ²² Anona nemaf anom amam mombaso'am mi'i amam Kraisi o mi'i amam profeti, motaga monda' ikwaf la'ifinai naninani hianai si'i God atona nanda'anai. Endilisi i'i amam la'ifim, mombaso'ma amam nematawa God nasahe'as ea' mohambombagas. Owa'. ²³ Ea' ipe' pindumafuma andeande'. Ae' ali' a'ipipa ea'ma amamaga amama nimanimi dei' ata' owa' meatagai.

Anona nemaf Jisas notanima nifi'i

²⁴ Nimanimi amama hiami ma nogota anama hi'ilam ea', mehip etin
 'aon alipunai netaga owamb, ea' aon owambunai
 wa na'ef ina molo, owa'.

²⁵ Ea' ondowa mowai otaga ilif, amamaga hiami la'ifimi mape otagai ea' bol etin mope.'

²⁶ Nogota anama esis amam nematawa siti ae' ataga epen endilisiwei eloma elagw otaga ilif ifi'i eloma amamaga howalagon bu'wami Godi moloma pepel Ananinai. ²⁷ Nogota anama Ae' iefi'ianai esapa' ensel amama Ae'ami mofe' etap hiagoma aon natefima nowalama wa'owa'ol anama biafigin biafigin mefe'agon hi'ilagon gan-ima etap otaga nafe' notambilima. Ensel amama mefe' mofa'ai esis amam nematawa God nasah'e'as ea'i Ananisi sondakolas etifigin.

Lawag fig nanda'am nihi'ambapa mogawa nogota anama amamaga meataganai

(Mt 24:32-35; Lu 21:29-33)

²⁸ Ipe' okokoma anom basef womun etina lawag anama fik. Ipe' piti ilaof monafa ma masowa, pegawa nogota anama nelemb ea' fele-fele'ma meaof.

²⁹ Ea' na'ama etin nemaf anama piti amamaga amama ali' a'ipipami motaga, ipe' pegawa ae' afi'i aitu felefele'ma uta. Ina ata' nogota laona, owa'. ³⁰ Ae' a'ipipa endilisi, amam nematawa dei' pape etap anae' ata' papani ina pega' ulal, ata' owa', ipe' piti amamaga amama motaga hi'ilam. ³¹ Otaga noloma etap hiagoma anona nemaf hegililam hi'ilam, ea' basef Ae'ami ina anona nemaf hi'ilam, owa'etin. Mope la'ela'ef hihif.

Ina enin epen negawa nemaf amamaga amama meataganai, owa'

(Mt 24:36-44; Lu 17:26-37)

³² Owa' enin epen negawa nemaf anama amamaga amama meataganai, owa'. Amam ensel mape heveni maloma ae' Nogalomana Ananiwei ina ogawa, owa'. God atona nogawa nemaf anama. ³³ Ipe' ina pegawa amamaga amama nambai' motaga, owa'. Na'ama pindumafuma, ukup motamea andeande' pepan. ³⁴ Ipe' peme' anom basef womun etin dei' ie'ipipami. Nemaf anama Ae' etanima iefi'ianai si'i anona aman nakwaha ipat ananinai nafe' anagon. Anan nofalai amam manda' maola anani mafi'i nawaloga maol nase'am atona etina mumafi amamaga ananimi. Ea' na'ipa aman numafi utai ma numafiana andeande'. ³⁵ Ea' ipe' pindumafuma andeande'. Ipe' ina pegawa nambei' Dembinai numafi ipati niefi'i. Nambimb nifi'i wambomota o amaneta o kwafolimbuta awatagw meada'am o kuhimbita atona, ipe' ina pegawam, owa'. ³⁶ Na'ama Anan nifi'i mehip niti ipe' ata' pe'eh etin. ³⁷ Basef amama ae' ase'epam ipe'i amama ae' a'ipa amam nematawa hiesi. Ipe' pindumafuma andeande' pepe ma amamaga ae' a'ipipami meataga.”

14

*Amam dambami Juda ma'i moha Jisas noga'
(Mt 26:1-5; Lu 22:1-2; Jo 11:45-53)*

¹ Anona nemaf bu'unai sa'i Pasova ma esis Juda sonda' gwa'aimi lu'wami sagwa' anona bret owa' neatef lu'unai. Nimeguf biam ata' mape ma nemaf anama bu'unai sa'i sea' gwa'aimi Pasova ea' notaga. Nemaf anama amam mawalipasa mi'uli Godi maloma anom pris dambami ma'i mondambaho' miti anona eaf ma mombalo' Jisas

mohana neaga'. ² Amam ma'iam na'ama ma'i, “Nemaf anama sanda' gwa'aimi lu'wami afa' ina ombalo'ana, hapainai. Na'ama epes hiesi ukup aom sohafel sonda' wandaf.”

Ano'w nemata'w kwakolo' sanda newala balaga Jisasi

(Mt 26:6-13; Jo 12:1-8)

³ Nemaf anama Jisas nape Betani, nape ipat anona aman Saimoni. Fowa' awes aonai nanda' alop ananinai nambo', dei' ambo'ona. Jisas ata' nape na' gwa'aimi etin nalomana, ea' ano'w nemata'w kwahapila anona botol sanda'ana si'i otam, sanda alogw bu'wami ma'anai satalom otamba lu'wami mala botol anama, agilinama nad. Ea' kopalia botol anama kwakolo'am mowala balaga Jisasi.

⁴ Ea' enis epes sape satolom sa'i, “Dei' maina kwakolo' sanda amama mafe' etin?”

Ea' esis ukup numbutim kwapete'as ma akwa'w, ⁵ ea' sa'i, “Dei' afa' ofa'am enis epes sose'afa moni nikila' 300 kina sotalom ofa'ana oso' epes isima kwahusa gwa'aimi maim, andeande'.”

Esis ukup numbutim endilisi mapoma nemata'w akwama.

⁶ Ea' Jisas na'ipas na'i, “Ipe' kwaho'w. Ipe' ina ukup aoma akwa'w, owa'. Akwa'w kwanda' waf bu'unai ma Ae'. ⁷ Isima gwa'aimi maim a'asi la'ela'ef sape salomepa. Maina nemaf pi'i pi-giambamas pese'as moni, andeande' pese'asana. Epes isima sape salomepa nimeguf hiami, ea' ae' owa'. Ae' ina elomepa epe nimeguf hiami, owa'.

⁸ Maol anama akwa'w kwogawana, kwanda'ana.

Felefele'ma nambimb esis sehe ega' ma sowe hi'agif. Okom ako'unai napoma felefele'ma ae' ega'. Na'ama dei' kofa'ai sanda amama kwafi'i kwakolo'am mowala balaga ae'anai kwakolo'am mowala alop ae'anai ma kwandondomba ae' ma seawe. ⁹ Endilisi Ae' a'ipipa, ganima etap anae' wambel hiagoma anona nemaf si'ipasa basef bu'wami Godi, si'ipasa basef ako'umi wapoti' ma ukup mopoma waf bu'unai akwa'w kwanda'meanai.”

Judas nihi'amba Jisasa agufumi Juda ma mofa'ana mohana neaga'

(Mt 26:14-16; Lu 22:3-6)

¹⁰ Amam amama Jisasi 12-peleim anona amamunai agilinama Judas Kariotinai nafe'ma amam pris hiami dambami. Anan na'i ni'ipama Jisas atona napoma mofe' mombalo'ana. ¹¹ Amam mame' basef ananimi mandanifel endilisi. Ea' ma'i basef mandame'mam na'ama ma'i, “Ande-ande', afa' ose'ena anona moni.”

Ea' Judas na'i nefe' nogolopa anona eafa nihi'ambama Jisas amama mombalo'ana.

Jisas na' gwa'aimi lu'wami sa'i Pasova naloma alupumi ananimi

(Mt 26:17-25; Lu 22:7-14,21-23; Jo 13:21-30)

¹² Nemaf anama sali' sa' gwa'aimi lu'wami sa'i Pasova esis sa' bret anama owa' neatef lu'unai, nemaf anama saha sipsip noganai sondolalima Goda sonda' gwa'aimi amama si'i afagof hiami sanda'am.

Ea' alupumi Jisasi mahali'ana ma'i, "Ine' na'i afa' ofe' ondondomba ipat enima ma afa' ofe' onda' gwa'aimi amama?"

¹³⁻¹⁴ Ea' Jisas na'ipa ananiami biam na'i, "Ipe' pefe' piwis gani wambel lu'unai, piti anona aman eaf nofa' embel malep lu'unai. Ea' pigi'mana pefe' piwis ipat anama anan nefe' niowisanai. Ea' pihali' kofagena ma ipat anama pi'i, 'Dembinai afa'inai na'ipafa na'i, rum ae'anai nape eti? Anan na'i no'wa afa' atofa alupufai ope onda' gwa'aimi amama Pasova.' ¹⁵ Ea' nihi'ambepa rum anama lu'unai nape ilif, ea' sandombana tebol siaifah ma'oh etifim. Ipe' pendondomba-mafa gwa'aimi rum anama."

¹⁶ Ea' amam mafe' mawis wambel anama mati amama si'i Jisas nali' na'ipami ea' mandondomba gwa'aimi amama Pasova rum anama.

¹⁷ Wambomota felefele'ma owamb, Jisas naloma alupumi 12-peleim mafe' mataga ipat anama

¹⁸ Mawis ata' mape ma' gwa'aimi etin, Jisas na'ipam na'i, "Ae' a'ipipa endilisi, anona afa'inai dei' nape nalomafa na' gwa'aimi, atuwasi nefe' nihi'amba amam naumbiha Ae' efe' eapoma."

¹⁹ Amam mame' na'ama ukup amamumi nimanim ea' mahali'ana atona etin ma'i, "Ae' o emi?"

²⁰ Ea' Jisas na'ipam na'i, "Anona afa'inai 12-peleim naloma ae' wahapila bret walata disi, ea' anama atona. ²¹ Ae' ataga epen enidilisiwei, naman enis epes sehe ega', si'i Buk Baibel na'iama Ae'. Ea' aman anama nowalapa Ae' ma naumbih, anan uwahipina endilisi. Nambimb nimanimi awami endilisi motagamana. Fowa' mama'wana

owa' ata' kolanai, andeande'. Ama anan ina notagama nimanimi amama awami, owa'."

Jisas nase'ama bret naloma embel wain alupumi ananimit

(Mt 26:26-30; Lu 22:15-20; 1 Ko 11:23-25)

²² Jisas nalomam ata' mape ma' gwa'aimi etin, nafela anona bret, nanda' beten nanifela God, nawalona nase'am na'ipam na'i, "Ipe' felana pea'ana. Bret anama alop Ae'anai."

²³ Ea' nafela anona kap embel wain nalanai nanda' beten nanifela God naso' amam hiami ma' embel etin. ²⁴ Ea' na'ipam na'i, "Embel amama esimbel Ae'ami manda' basef amama God na'i endilisimi atomi motaga la'ifim. Ae' ekolo'wama igiambama amam nematawa hiesi. ²⁵ Ae' a'ipipa endilisi, ae' ina ata' etanima ea' embel wain wapoti', owa'. Efe' etaga wambel Godi, ea' anona wain dambainai."

²⁶ Amam manda' anona awaf ea' mawisi mafe' mondowasa' halaf lawah oliv motawama.

Jisas na'i Pita atuwasi nombaho' agel Jisasi

(Mt 26:31-35; Lu 22:31-34; Jo 13:36-38)

²⁷ Ea' Jisas na'ipa alupumi na'i, "Fowa' gani Baibel na'i na'ama na'i, God na'i, 'Anona nemaf owagama gani, Ae' eha aman anama numafi sipsipi noga'. Ea' sipsip amama atuwasi mofa' mofe' atona etin.'

Ea' Jisas na'ipam na'i, atuwasi ipe' pekwaha pembale'efa ae' pefa' pefe' atona etin, si'i fowa' gani God na'iam.

²⁸ Ea' nambimb ae' etanima ehafel wapoti', ili'ipa efe' etap hiagoma Galili."

²⁹ Ea' Pita nagwamana na'i, "I'i amam hiami ine'imi mokwahina, hapaimi, ae' owa'."

³⁰ Ea' Jisas nagwamana basef na'i, "Ae' a'ipina basef endilisi, dei' owamb anae', awata ata' owa' nonda'am bif, ine' nembaho' agel ae'anai ni'i wenif ni'i, 'Ae' owa' egawa Jisas.'"

³¹ Ea' Pita na'ipana mehip na'i, "I'i esis sohafa, afa' biafa oga' etin. Ae' ina embaho' agel ine'inai, owa'."

Ea' alupumi hiami Jisasi ma'iam na'ama etin hi'alam.

Jisas nape anagon Getsemani lawah oliv motawama nanda' beten

(Mt 26:36-46; Lu 22:39-46)

³² Ea' Jisas naloma alupumi ananimi mafe' mataga anona etap Getsemani, ea' na'ipam na'i, "Ipe' pepe na'ae. Ae' efe' gani wa'ol enda' beten."

³³ Ea' Jisas nao'wa Pita naloma Jems naloma Jon mafe' malomana. Ea' opaf Jisasi aona kwapete'ana. ³⁴ Ea' na'ipam na'i, "Opaf ae'anai nimanina endilisi ma ega', nomonas ae'ami aom endilisi. Ipe' pepe na'ae pindumafuma pepe pehafa ae' etanimai iefi'i."

³⁵ Ea' Jisas nandamboma nafe', nambe' opaf na'oh etap nanda' beten. Na'i notofa amamaga awami amama anan atuwasi meatagamanai.

³⁶ *Ea' nahali' God na'i, "Aba* Ahalome, ine' la'ifinai ma nanda' amamaga hiami hi'alam. Nekwahome nimanimi amama. Ea' nila okom ine'inai atona, ae' owa'."

* **14:36:** Ro 8:15; Ga 4:6; Mk 10:38; Jo 6:38

* **14:36:** Basef amama aba ma'i Ahalome.

³⁷ Anan nahali'ana ea', nohafel notanima nafe'ma alupumi ananimi mapoma. Nafe' natolom ea', nati amam ma'oh maga' mafe'. Ea' nofala Saimon Pita na'i, "Saimon, ipe' ata' owa' pepe, pa'oh etin a'amon? Dei' maina ipe' owa' la'ifipama pepe pehafa ae'? Nogota ina ata' laona ma ie'ipipa a'i pepe, owa'. ³⁸ *Ipe' pindumafuma andeande' pepe penda' beten. Na'ama amamaga meagwambipei meatagamepa. Endilisi ukup ipe'imi ma'i awima penda' beten, ea' alop owa' la'ifina, ala'uta naepa ma penda beten pelome."

³⁹ Jisas na'ipam na'ama ma ea', notanima nafe' nanda' beten. Nahali'anama basef amama atom nali' nahali'anamami. ⁴⁰ Nahali'ana ea' nandamboma notanima nafi'i amam mapoma nati ata' ma'oh. Ea' ninimbalom mohafel ma'i, "Atuwasi afa' wi'ipana maim basef?"

Ambeh maham ea' ma'oh maga' mafe'. ⁴¹ Ea' anan nandamboma notanima nafe' wapoti' nanda' beten si'i do'ok nali' nanda' beten bif. Ea' notanima nafi'mai amam na'ipam na'i, "Ipe' papoma noma'w pa'oh etin? Dei' ipe' koh ea', hafel. Dei' nemaf anae' anona aman nifi'i nulumai anom amam awami mufi'i mowa' ae' ataga epen endilisiwei. ⁴² Hafel! Afa' ofe' uti aman anama nihi'ambama ae' dei' nafi'i."

*Judas nawalapa Jisasa amam naumbih
(Mt 26:47-56; Lu 22:47-53; Jo 18:3-12)*

⁴³ Jisas ata' naitu na'ipam etin, anona aman nafi'i. Aman anama Judas anona amam 12-peleim alupumi ananimi nafi'i nalumai amam hiami mahapila bainahi belep malomana mafi'i.

* **14:38:** Lu 11:4

Amam pris dambami malumai amam agufumi dambami esis Judai masapa'am mafi'i.

⁴⁴ Aman anama nawalapa Jisasi, nali' na'ipam nanda' ikwaf nihi'ambam na'i, "Atuwasi piti ae' iesisi' dalogwanai, aman anama ea' Jisas ma'una. Ipe' pembalo'ana pewa'ana andeande' pefa'ana pefe'."

⁴⁵ Amam ata' mataga etin, Judas nafe'ma Jisas na'ipana na'i, "Dembina' Tisa."

Ea' nasisi' dalogwana. ⁴⁶ Ea' amam membalo' Jisas. ⁴⁷ Ea' anona aman naitu felefele'ma Jisasi nagiai bainat naha anona aman nanda'mana maola pris dembinai nape nali'ma pris hiami, natopa' aliga ananinai pele'atana nowa.

⁴⁸ Ea' Jisas na'ipa amam naumbih na'i, "Ipe' pefa'ai bainah maloma belep pafi'i pa'i pewa' anona aman aonai nanda' wal napa' naloma gavmani? ⁴⁹ Nimeguf hiami ae' ape alomepa felefele'ma ipat lu'unai Godi awalapa basef bu'wami ma esis aman nematawa hiesi, ea' ipe' owa' pembale'e. Ea' dei' paila basef mape Baibeli pafi'i pewa'e si'i basef fowa' gani ma'iam. Ae' a'i basef amama dei' motaga endilisi mola' gwa'aimi."

⁵⁰ Ea' alupumi ananimi hiami makwahona mafa' mafe' hi'alam.

Anona aman sa'unai nafa' nafe'

⁵¹ Ea' anona aman sa'unai nagima Jisas nafi'i nowaho' anona lowaf afitinai ea' amam mahapila bainah maloma belep ma'i mombalo'ana.

⁵² Ea' anan nakwaha lowaf atona na'oh ea' nafa' nafe' etin.

Amam manda' kotima Jisas

(Mt 26:57-68; Lu 22:54-55,63-71; Jo 18:13-14,19-24)

⁵³ Amam mofa' Jisas mafe'ma pris dembinai nape nali'ma pris hiami. Anan naloma amam pris dambami maloma amam dambami Judai maloma amam mawalipasa mi'uli Godi amam hiami mandakolas etifigin. ⁵⁴ Ea' Pita ina nalomam etin nafe', owa'. Anan nagimam nafe' nawis endalelemba pris anama dembinai ea' nape naloma amam polisman mapoma nif. ⁵⁵ Ea' amam pris dambami maloma amam dambami Juda hiami mumafi koti ma'i mogolopa enis epesa sombaso'mana ma anom basefa moha Jisas neaga'. Ea' amam ina mati enis, owa'. ⁵⁶ Esis hiesi sambaso'mana ma anom basef ea' ina sa'i endilisimi mafe' etifigin, owa'. Sa'iam mafe' deindei.

⁵⁷ Ea' amam maitu mambaso'mana ma anom basef na'ama ma'i, ⁵⁸ "Afa' wame' Jisas na'iam na'ama na'i, 'Ipat lu'unai Godi epes sanda'anai, nambimb Ae' etalona, ma nimeguf wanom ea' efelona notawa wapoti'. Ea' Ae' ina enda' lagof epesi efelona, owa'." "

⁵⁹ Basef amama amam ma'iami ina ma'i endilisimi mafe' etifigin, owa'. Ma'iam mafe' deindei. ⁶⁰ Ea' pris anama dembinai naitu la'afen nahali' Jisas na'ama na'i, "Ine' negwa basef amama, o owa'? Dei' maina amam ma'ipina basef na'ama?"

⁶¹ Ea' Jisas nasopama malogel naitu. Anan ina nagwamana basef anan, owa'. Ea' pris anama dembinai nahali'ana wapoti' na'i, "Ine' Krai

aman anama God nandandepena nasapa'ena nafi'i o owa'? Ine' nogalomana Godi ape' manda' lotumanai, o owa'?"

⁶² Ea' Jisas na'i, "Endilisi ae' ma'uwi. Ea' anona nemaf ipe' piti ae' ataga epen endilisiwei epe lagel da'isinai Godi, epe otaga ilif itanimai ifi'i petolowe."

⁶³ Jisas na'iam na'ama, ea' pris anama okom wandafuna, ea' nahape' lowaf anama nalanai na'iam na'i, "Ape' ina ata' mofalai enis epes wapoti' sifi'i si'i anom basefa anan, owa'. ⁶⁴ Anan nanda' God findiwana ea' amama pame'am. Dei' ipe' ukup mape ma'imama?"

Ea' amam hiami ma'i anom basef mandame'mam ma'i, "Anan nanda' waf aonai afa' ohana nega'." ⁶⁵ Ea' anom mohafel misisi'wafana masopama naep ananimi mahana ma'ipana ma'i, "Ni'i basef si'i profet newalapa emi nahena."

Ea' amam polisman mafi'i mahana mofa'ana mafe'.

Pita nambaso'mas nambaho' agel Jisasi

(Mt 26:69-75; Lu 22:56-62; Jo 18:15-18,25-27)

⁶⁶⁻⁶⁷ Ano'w nemata'w kwanda'mana maol pris anama dembinai kwafi'i kwati Pita napoma nif ipat ande'. Ea' kwaitu kwatolona kogawana kwa'ipana na'ama kwa'i, "Enina ine' nape naloma Jisas Nasaretinai."

⁶⁸ Ea' Pita nambaho' agel Jisasi na'ipakw na'i, "Owa'. Ae' ina egawa basef ofagema ine' na'iami."

Ea' anan nohafel nafe' felefele'ma endambel uta, anona awata nonda'am. ⁶⁹ Ea' nemata'w akwama kwatolona kwa'ipas isima saituu felefele'i wapoti' kwa'ipas na'ama kwa'i, "Aman anama wapoti' alupunai Jisasi."

⁷⁰ Ea' Pita na'iam wapoti' na'i, "Ae' ina egawana, ae' owa'."

Nogota bandana ea' enis saituu felefele'i sa'ipa Pita wapoti' sa'i, "Endilisi, ine' alupinai naloma amam Jisasi. Ine' wapoti' aman Galilina'i."

⁷¹ Dei' Pita nambaho' agel Jisasi na'i basef la'ifimi na'i, "Endilisi ilif, ae' ina egawa aman anama ipe' pa'ianai, owa'."

⁷² Anan na'iam ea', awata nanda'am bif ea' Pita okokoma basef do'ok Jisas na'ipanami na'i, "Awata owa' ata' nonda'am bif, ine' nembaso'mas ni'iam wenif ni'i, 'Owa' negawea.'" "

Ea' Pita okom napoma basef amama ea' nalef mehip.

15

Amam mofa' Jisas mafe'ma Pailat manda'mana basef

(Mt 27:1-2,11-14; Lu 23:1-5; Jo 18:28-38)

¹ Kuhimbata atona amam pris dambami maloma anom dambami Judai maloma amam mawalipasa mi'uli Godi maloma anom Juda dambami mumafi koti, amam hiami mandakolas maila basef etifim. Amam mowa' Jisas mofa'ana mafe' maso' gavman dembinai Pailat. ² Ea' Pailat nahali'ana na'i, "Ine' king dembinai esis Judai o owa'?"

Ea' Jisas nagwamana basef na'i, "Basef amama ine' na'iami endilisimi."

³ Ea' amam pris dambami mambaso'ma Jisasa basef hiami. ⁴ Ea' Pailat nahali'ana wapoti' na'i, "Ine' owa' negwa anom basef? Ine' neme!. Amam manda'mena basef hiami ma ine!."

⁵ Ea' Jisas ina nagwa anom basef wapoti', owa!. Na'ama Pailat okom natanea.

Pailat na'i esis sunda Jisas lawag usi'inai tu'wanainai sohana noga'

(Mt 27:15-26; Lu 23:13-25; Jo 18:39-19:16)

⁶ Nemaf anama esis Juda sanda' anom gwa'aيمي lu'wami sa'i Pasova. Afagof hiami ma nemaf anama Pailat nanda'am na'ama. Anan nakwaha anona nape kalabusi nafe' wafifina. Emi epen esis amam nematawa sa'ianai, Pailat name'asa nakwahona nafe'mas. ⁷ Nogota anama anona aman nape kalabusi agilinama Barabas. Anan nanda' kalabus naloma anom amam mapa' maloma gavmani maha enis saga'i. ⁸ Ea' esis hiesi safi'i saituu sofala Pailat sa'ipana sa'i, "Ine' nekwaha anona aman nape kalabusi nifi'mai ape' wafifina, si'i afagof hiami nanda'am."

⁹ Ea' nagwamasa basef na'i, "Dei' ae' ekwaha king dembinai ipe' Judai nefe'mago ipe', o emi?"

¹⁰ Dei' main, Pailat anan nogawa amam pris dambami kowalama epes hiesi saila basef Jisasi ukup aom atom mapomana dei' manda' koti-mana.

¹¹ Ea' amam mafela ukup ma esis amam nematawa hiesi ma sohali' Pailata nokwaha Barabas atona nufi'mai esis.

¹² Ea' Pailat na'iam wapoti' na'ama na'i, “Aman anama ipe' pefalona pa'i king dembinai esis Judai, ipe' pa'i ae' enda' i'imamana?”

¹³ Ea' esis sa'i mehipe' sa'i, “Undana nil lawag usi'inai tu'wanainai!”

¹⁴ Ea' Pailat nahali'as na'i, “Dei' main? Anan nanda' maina waf aonai?”

Ea' esis sa'i mehipe' sa'i, “Undana lawag hana afuna!”

¹⁵ Ea' Pailat naila ukup asasimi, nakwaha Barabas nafe'ma esis na'ipa amam soldia ma mopagaha Jisas mofa'ana mefe'ma mundana lawag usi'inai tu'wanainai.

*Amam soldia manda' Jisas findiwana
(Mt 27:27-31; Jo 19:2-3)*

¹⁶ Amam soldia mofa' Jisas mawisi ipat gavmani lu'unai. Ea' mofala anom soldia hiami mafi'i munduwa'anima ma anan, ¹⁷ malamana saket akwahinai. Ea' mofa'ai anona mandof higatagunai manogana mala'watefana sili hat mowalo'manana balaga ananinai. ¹⁸ Ea' maitu manda'ana findiwana ma'i, “Nemaf bu'unai, ine' king dembinai esis Judai!”

¹⁹ Ea' amam mahana anona elifita balaga ananinai, misisi'wafana mindiwa nembawa motawa mafela agel ananinai etin. ²⁰ Manda'ana findiwana ma ea', mowalimana saket anama akwahinai, malamana lowaf ananinai mofa'ana mafe'ma mundana lawag usi'inai tu'wanainai.

*Amam soldia maunda Jisas nail lawag usi'inai
tu'wanainai
(Mt 27:32-44; Lu 23:26-43; Jo 19:17-27)*

²¹ Amam soldia mofa' Jisas mafe' ata' mafo'lo eaf la'afen ea' matagama anona aman Saimon Sairininai nafi'i. Batausana ananiami biam, Aleksanda naloma Rufus. Saimon napani aolop nafi'i na'i nefe' Jerusalem. Ea' amam soldia mas-apa'ana nofa' lawag Jisasi. Ea' nofa'ana nafe'.
²² Ea' mofa' Jisas mafe' mataga anagon agiliguma Golgota. Ape' dei' mambomefagel ma'i, Pipitagel Balagaina.

²³ Ea' mase'ana anom embel wainim mam-bomom malomana anona marasin agilina mer ma nea' embel mohogofa ekep pehana. Ea' anan ina na'i a'e na'am, owa'. Nandaiwa'mam.

²⁴ Ea' maundana lawag usi'inai tu'wanainai ea' manda' satu ma luwaguf maim ananiami ma emi nikila' nefa'am mondandam atona etin.

²⁵ Kuhimbata aon ata' natefi naili 9 klok, soldia mofa' Jisas mafe' maundana lawag anama.

²⁶ Amam mofa' anona pepa basef amama do'ok amam Juda mambaso'ma Jisasami Pailat nanda'am mail ma'i, "AMAN ANAMA KING ESIS JUDAI." Amam manda' basef amama mail balaga Jisasi lawag ilif.

²⁷ Felefele'ma Jisas naima, amam soldia maunda anom biam manda' waf aonai manda' wali. Amam maunda Jisas nail la'afen, ea' maunda amam biam mail wa'owa'ol.

[²⁸ Na'ama si'i anom basef Baibel na'iami dei' mataga alihim mandawalap. Basef amama ma'i na'ama ma'i, "Anona nemaf esis ukup mopoma anan noloma amam amama manda' waf aonai."]

²⁹ Ea' enis amam nematawa safe' safi'i eaf sanda' salamala anan samboma balagah sa'iam na'ama sa'i, "Ine' ewi, ine' aman netala ipat anama dembinai Godi, ma netanima nefelona

nela'ana nimeguf wanom, ³⁰ dei' nigiangbama ine' nendatagah nisila'i.”

³¹ Ea' amam pris dambami maloma amam dambami mawalipasa mi'uli Godi hiami malomam maitu manda'ana findiwana ma'i, “Anan nagiambama enis epes ea' dei' ina nagiambama anan, owa'. ³² I'i aman anama Kraisi Dembinai esis Israeli, anan nokwaha lawag nisila'i ma motolona mombale'efana.”

Amam biam saundam maloma Jisasi wapoti' manda'ana findiwana ma basef awami.

Jisas naga'

(Mt 27:45-56; Lu 23:44-49; Jo 19:28-30)

³³ Aon nahagasom owamb lu'unai nataga etap hiagoma esis Judai akotigin. Owamb nape nafe' nafe' ma aon nasa nape 3 klok wambomota. Ea' aon howalagon wapoti'. ³⁴ Aon nasa nape 3 klok, Jisas noga na'i mehip na'i, “Eloi, Eloi, lama sabaktani?”

Ape' mambomam ma'iam na'ama ma'i, “God ae'inai, God ae'inai, dei' maina ine' nakwahowe?”

³⁵ Enis epes saituu felefele' same' anan na'iam na'ama sa'i, “Peme'. Anan nofala profet Elaija.”

³⁶ **Ea' anona aman nasagih nafe' nofa' anom mosong* mape naohi nalam mowala embel wain numbutimi nagiama nasapa'am anona elifita nandowana nafe'ma Jisas nea' embel. Ea' aman anama na'ipas na'i, “Ipe' ata' ota' muti Elaija atuwasi nifi'i notagahona nisila'i o owa'?”

* 15:36: Emo 8:9; Mk 15:34; Sam 22:1

* 15:36: Sam 69:21

* 15:36: Niti futnot Matyu 27:48.

³⁷ Ea' Jisas na'i mehip endilisi naga' ea'. ³⁸ Ea' dei' lowaf anama lu'unai si'i uta nail ipat Godi lu'unai sanda' lotuwanai nomon palalana gani ilif nowala etap nataga biefina. ³⁹ Ea' kepten anama dembinai numafi soldia hiami, naitu felefele'ma Jisas nati anan naga' na'ama ea' na'iam na'i, "Endilisi, aman anama nogalomana Godi."

⁴⁰ *Ea' anowa nematawa waituwi laogon walogini awama. Ano'w Maria Makdalai'wi kwaloma ano'w agel atona Maria mama'wana Josep naloma Jems sa'unai kwaloma ano'w Salomi.

⁴¹ Fowa' Jisas ata' nape Galili, awo waila anani ma wagiambamana ma anom amamaga gwa'aimi maim. Anowa hiawai wapoti' walomana ondowasa' Jerusalem.

Amam mawa Jisas anona owap lu'unai nagal nawis nomon

(Mt 27:57-61; Lu 23:50-55; Lu 19:38-42)

⁴² Ea' wambomota felefele'ma owamb, Josep Arimateainai nafi'i.

⁴³ Anan dembinai ma kot esis Judai, agel lu'unai. Nape nohafa nemaf bu'unai notaga ma hiesi siowis wambota Godi numafias. Dei' sandandomba amamaga gwa'aimi maima naman nemaf anama Sabat notaga. Ea' Josep nafe' nawis naitu naep Pailati. Anan ina umbamahana, owa'. Nahali'ana ma nofa'ai alop Jisasi nawana. ⁴⁴ Ea' Pailat gegelalasona okom na'i Jisas ina dei' afuna endilisi, ata' owa'. Ea' nofala anona dembinai soldia nafi'i nahali'ana na'ama na'i, "Jisas naga' ea' o owa'?"

* **15:40:** Lu 8:2-3

⁴⁵ Soldia anama na'ipana na'i, "Jisas naga' endilisi ea'."

Ea' Pailat na'ipa Josep na'i, "Ine' nefe' nefa' alop Jisasi."

⁴⁶ Fowa' nanda' anona hi'agif nagwasa owap lu'unai nagal nawis nomon. Ea' dei' anan na'i nowa Jisas hi'agif anama. Ea' nafe' notala anona lowaf afitinai nafi'i natagaha alop Jisasi nisila'i ma nanda' lowaf anama nowa'ana ma ea', nas-apa'ana nawis hi'agif anama nalana nomon. Ea' namboma anona owap lu'unai nafe' nowalo uta hi'agif anama. ⁴⁷ Anowa nematawa biawa Maria Makdalai'wi kwaloma Maria mama'wana Josepi, awau waitu watologon wati anama Josep nawa Jisas.

16

Jisas notanima nohafel wapoti'

(Mt 28:1-8; Lu 24:1-12; Jo 20:1-10)

¹ Nema'f anama sapoma noma'wanai nafe' hi'alana, Maria Makdalai'wi kwaloma Maria mama'wana Jems kwaloma Salomi watala anom wel alogw bu'wami ma'ami. Awau wa'i ofa'am ofe' ondisa alop Jisasi. ² Wafilu nema'f Sande, kuhimbata atona awau ofa' wel amama wafe' hi'agif. ³ Awau ata' wafe' etin eaf, wanda'ipama na'ama wa'i, "Atuwasi emi nigiambamafa nele-fata owap anama nowalo utai?"

⁴ Ea' watologon, wati owap anama lu'unai ina ata' nape nowalo uta, owa'. Enin epen nafe' nausi'ana nafe' na'oh wa'ol. ⁵ Awau wawis hi'agif nomon, wati anona aman sa'unai tol nape uta wa'ol lagel da'isinaima. Nala anona

lowaf launai afitinai. Na'ama awau gegelala-sowa kwapete'awa umbamahawa. ⁶ Ea' anan na'ipawa na'ama na'i, "Ipe' ina umbamehepa, owa'. Ae' egawepa ipe' pafi'i pegolopa Jisas Nasaretinai, esis saundana naga' lawag usi'inai tu'wanainai. Anan notanima nohafel ea', ina ata' nape na'ae, owa'. Ipe' piti na'ae sofa'ana sawisi salana nalama. Dei' wafigin nape. ⁷ Ea' ipe' fo'o pi'ipa alupumi ananiami ea' pi'ipa Pita nalomam na'ama pi'i, 'Jisas nali'ipa nafe' etap hi-agoma Galili. Ipe' pefo'o petolona si'i nimbewa' na'ipipa.' "

⁸ Ea' wakwaha hi'agif wawisi ande' wasagih wafe'. Awau umbamahawa wanda'am bombol etin. Ea' awau ina wa'ipasa basefa enis epes, owa'.

*Maria Makdalai'wi kwati Jisas
(Jo 20:11-18)*

⁹ * [Jisas notanima nohafel Sande* kuhimbita atona, ea' nali' natagama Maria Makdalai'wi, fowa' natofama'wa ambagof awami 7-peleim mapai'wi. ¹⁰ * Akwa'w kwafe' anagon alupumi Jisasi mapoma. Ukup amamumi nimanim endilisi, mape malef. ¹¹ Ea' kwa'ipam kwa'i, "Ae' ati Jisas notanima nohafel wapoti' nape namunai."

Amam mame' basef amama ako'umi, ea' ina meme' basef akwa'umi ma'i endilisimi, owa'.

*Amam biam alupumi Jisasi matolona eaf nafe'
Emeusi
(Lu 24:13-35)*

* **16:9:** Lu 8:2 * **16:9:** Niti futnot Matyu 28:1. * **16:10:** Mt 28:10

¹² Amama mataga ea', anom alupumi Jisasi biam makwaha wambel lu'unai maila eaf nafe' aolopi mafe'. Ea' Jisas nandati na'ana nafe' natagamam. ¹³ Amam biam matolona motanima mafe' mawalapa basef amama ma anom alupumi Ananimi mapani, ea' amam ina membale'efam, owa'.

*Jisas nase'ama maol amam alupumi ananimi
(Mt 28:16-20; Lu 24:36-49; Jo 20:19-23)*

¹⁴ *Amama mafe'ma ea', alupumi 11-peleim Jisasi mape ma' gwa'aimi etin, Jisas nafe' natagamam. Nimbewa' enis satolona notanima nohafel wapoti' ea' sa'ipa amam ma Anan nahafel ea'. Owa'. Amam ina membale'efas ma'i sa'i endilisi, owa'. Ma'i opalef amamumi maso'. Na'ama Jisas na'ipama basef la'ifimi.

¹⁵ Ea' na'ipam na'ama na'i, "Ipe' pefe' wambel hiagoma pi'ipasa basef bu'wami Godi ma amam nematawa hiesi hi'ilas. ¹⁶ *Emi egafis sembale'efa ae' sofa' baptais, anona nemaf God notanima nefa'asi wapoti' ea' Ananisi. Ea' isima owa' sembale'ifi, anona nemaf God nondamas kota basef lu'wami ma waf aonai esis sanda'anai.

¹⁷ *God nambimb nondas esis isima sembale'efi sotaga la'ifisa sonda' ikwaf hianai naninani si'i anan nanda'anai. Ea' sohali' Ae' ma enda'as sotaga la'ifisa sili'amona ambagof awami mapeisi, ea' si'i anona diga hianai dambainai. ¹⁸ Ea' sohapila iguf mahasi lagof asasimi ea' ina mohas sogal, owa'. Ea' sea' embel numbutimi wapoti', esis ina sogal, owa'. Ea' enis owa' seambale'efi,

* **16:14:** 1 Ko 15:5 * **16:16:** Ap 2:38 * **16:17:** Ap 2:4; Ap 8:7; 10:46

sea' embel amama, esis sogal. Ea' nambimb esis isima sembale'ifi sosa lagofa enis epes awes nanda'asi sotaga bo'wes wapoti'."

God nofa' Jisas nalata heven

(Lu 24:50-53; Ap 1:9-11)

¹⁹ Dembinai Jisas nawalipas na'ipas ea', God nofa'ana nalata heven. Ea' nofa' agel lu'unai nape lagel da'isinai Godi. ²⁰ Ea' alupumi Ananimi mafe' gani wambel hiagoma mawalapa basef Godi. Anan nanda'am mataga la'ifim manda' ikwaf hianai naninani si'i God nanda'anai. Enis epes sati maol anama amam manda'anai sa'i, "Endilisi, God nagiambama amam ea' ape' mag-awa basef Ananimi endilisimi."]

BASEF BU¹WAMI GODI
The New Testament in the Filifita Language (Ilahita
Dialect), East Sepik Province, PAPUA NEW GUINEA
Nupela Testamen long tokples Filifita long Niugini

copyright © 1998 Wycliffe Bible Translators, Inc.

Language: Filifita (Filifita dialect of Mufian)

Dialect: Filifita or Ilahita

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-18

PDF generated using Haiola and XeLaTeX on 21 Feb 2024 from source files dated 9 Oct 2020

042dd872-74b3-5958-88ef-d4db936348e2